


LIZE LIKUMBI HA KAVALI

 Ngwasakwila, Ndumbu walunga Neville. [Ndumbu walunga Neville ngwenyi, “Vakukisule, ndumbu walunga!”—Muka.] Kalunga amikisule, Ndumbu walunga Neville. Ngwasakwila, chikuma.

² Chimene chamwaza, masepa. Eli linapu lisesa hano ha mbalaka cheka, chimene chino, kuzachila Mwata, mujila ya kunangula eli Lizu na kulombelela vakakuviza. Kaha Nguli wakuwahilila chikuma hali lino likumbi.

³ Kaha Ngwapwanga wakulikomokela, omwo Ngwezanga nakwingila. Ndumbu walunga ezanga kaha ngwenyi, “Kangwazangila kupwa nge mukambumba wakuhona kutela uze vokele.” Apwanga Ndumbu walunga Wright. Ngwamulombelele ikiye, kaha Mwata namuhindula mwosena. Kaha ikiye ejile, nakulila, kumeneka livoko lyami, kaha ahanjikanga ngwenyi—nge ikiye ali nakutonda kusakwilila Mwata ha—ha kupwa wakuhinduka. Ikiye atondanga kukinduluka na kuhana kusakwilila. Wosena unanyi. Ikiye—ikiye ali wakukupuka jino. Etu tunawahilila ha awa maunjihō.

⁴ Kaha Charlie, ove na Ndumbu walunga Jeffries, kachi enu mwatondo, kwiza hano na kumbata evi vitwamo hano. Kaha enu muli vakutambokesa, shikaho enu mwatela kwimana. Ndumbu walunga mukwavo kuze, kaha Ndumbu walunga Wood, twaya kaha hano. Enu muli. . . Hano chindende, vihela vyavivulu hano hachitwamo, shikaho enu kamwatela kwimanako. Ngwafwelela, vihela vyavivulu kuno, kaha, eyo, enu muli vakutambokesa chikuma kwiza na kumbata evi vihela.

⁵ Etu tunawahilila kupwa na. . . Ngwafwelela vachihanjikile ngwavo, lwola lumwe, “Ngwapwile wakuwahilila omwo vakiko vahanjikile kuli yami. . .” Kalunga akukisule, ndumbu walunga. [Ndumbu walunga umwe ngwenyi, “Lwola lwosena azanga kupwa hakamwihi na mukakunangula.”—Muka.] Ngunamisakwilila. Ngunasakwila, ngunamisakwilila. “Ngwapwile wakuwahilila omwo vakiko vahanjikile kuli yami, echenu tuyenu kuzuvo ya Mwata.” Elu lunapu lusesa lwa Vakakulishitu na kuwahilila, kuya muzuvo ya Mwata.

⁶ Kutala tala, kumona masepa jami vavavulu muno, chimene chino, Yami nguli wakuzezuka chikuma hali echi. Ngunapu wakuwahilila ha kumona Ndumbu walunga na Wapwevo Dauch hano, kufuma ku Ohio. Ngwamono Ndumbu walunga na Wapwevo Armstrong kunyima kuze, kufuma kwosena kuze ku Ohio. Kalunga amikisule muvosena, nayenu nawa. Kaha, mamlelo, kutala tala, muli nakumona vavavulu, echi nachipwa nge chuma chachikalū kutachiza majina avo osena. Ndumbu

wapwevo Hoover, etu tunawahilila kukumona muno, chimene chino, kufuma ku Kentucky. Kaha Charlie na Neville, Ndumbu walunga Jeffries na chisaka chenyi, navosena vavavulu muli muno, vakufuma kuweluka wayino mbongi.

⁷ Shikaho etu tuli nakuvandamina lwola lwalunene muli Mwata, chimene chino, kuvandamina Kalunga kuliwana nayetu mujila mwaya nakukisula myono yetu kutuzachila vyuma etu tunatondo kupwa navyo.

⁸ Kaha omu Nangumona nakutala kuze nakuze, kachi Nanguya nakusanyika masepa jami vosena vali hano, Nanguya nakumbata chimene, kuhanjika hali vamwe vakuhandunuka. Cheji kungulingisa kwivwa kanawa kukinduluka kuliuka, kumona vathu vosena muno, kwiza kukuliwana.

⁹ Nachikapwa ngachilihi omwo etu natukaya Mwilu, kaha etu natukaliwana Kuze halwola lwaunene haya myaka na myaka, Kulikata hamwe cha hayamyaka yee, kujinguluka ku Litanda Iya Kalunga, kaha echi kukisula echi tuli nacho chosena nachikapwa chachilemu? Etu, Kuze, natukaya nakupwa mukufwana Chenyi, na muchifwanyisa Chenyi, na Shipilitu Yenyi hali etu, kulifukula na kuzachila Ikiye Hayamyaka, kakweshi kukulako.

¹⁰ Shinganyeka kaha, kakweshi kala chumako echi munahase kushinganyeka, chize munazange kulingako, oloze muze wapwile lwola wazeyele mukulinga chize. Charlie, Ngwashingtonyeka enu na Yami twahangasanaho lyehi mihale kuhambakana kala chuma chize etu twazanga kulinga, mujila kana, oloze, munatachikiza, mwazeyele hakulinga echi.

¹¹ Kaha Ngwa—Ngwazange kupwa na—na kunyina, nakuya kuya mujipili na kunyina kaha. Oloze Ngweji kupwanga wakuzeya, lwola lumwe, ove mutonda kulinga chuma chimwe.

¹² Kaha Ngwazanga kwendesa. Lwola lumwe Ngweji kwivwanga nge kupwa wakuzeya kaha wakuzeyelela, nakuheta nakuhona ngolo. Nanguya kaha nakutumbukila mumotoka yami nakumbatamo, nakukwachilila kushiteyalini, nakuya mujila, kwimba, “Nguli wakuwahilila nge Nguhanjike Nguli umwe wavo,” mokomoko chumachimwe. Mawilo kufula, na kwimba, na kulyachangila vilyachilo vyami, na kutambakana. Kaha, chamwaza, hanyima chindende, Ngwazeyele, kaha jino Ngwakindulukile kwimbo nakuputuka chuma cheka.

¹³ Oloze omwo etu natuya nakulifukula Kalunga mu Wangana wauhya, muze kamweshi kupwa lwola lwakuzeya ko, shina—shina nakuya kaha nakupwa kukisula kaha, kutwalilaho lika nalika. Oloze, mukiko vene, etu natuya nakupwa vakwalumuka. Etu natukaya nge omu tuli jino. Etu natukapwa vakuhandunuka, tengeso yakuhandunuka kuhambakana omu tuli lwola luno. Shikaho, etu twawahilila.

14 Ngwapwanga kaha nakushinganyeka. Ngwahono kutachikiza nge Ngwalingaho lyehi echi, kuchihanjika mokomoko chiku. Ndumbu walunga Charlie, lwola lumwe kunyima okwo, Ngwapwile ku Kentucky na ikiye, kaha ikiye ngwenyi, “Ndumbu walunga Branham, ove unashinganyeka, mumyaka Likombakaji, ove na Yami natukaya na kukwata mihale?”

Ngwambile ngwami, “Kangweshi nakushinganyeka ngochoko, Charlie.”

15 Ngwenyi, “Chamwaza, etu twazanga echi chikuma,” ngwenyi, “ove—ove washinganyeka nge etu natukalinga ngocho mumyaka Likombakaji?”

Ngwambile, “Nduma, kamweshi kapwa vya kujihajiha muze mumyaka Likombakaji.”

Kaha ikiye ngwenyi, “Chamwaza, etu twachizanga echi.”

16 Ngwambile ngwami, “Charlie, nachikapwa ngachilihi nge Nangukukunyukisa ove nge lwola lumwe ove wapwile ungulu, kaha ove vanakukulisa nakukuzundula helu, na kupwa muthu? Ove unahase kuya, unahase kukinduluka na kusuuwuluka na chiseke cha ngulu?”

Ngwenyi, “Nduma.”

17 Ngwambile ngwami, “Tala, ove muya nakupwa helu kuhambakana ngulu, jino, ove uli muthu, ove kaweshi kahasa katonda kupwa ngulu chekako.” Ngwambile ngwami, “Jino vulisa chize kapapa ka teni sauzande, kaha muze mukiko ove mukaya nakupwa omwo navakakwalumuna kufuma hano nomwo mukapwa. Ove kaweshi kazanga kupwa cheka muthuko.”

18 Echi chakwoloka. Nachiya nakupwa chumachimwe chakuhandunuka. Yami ngunawahilila hali evi vishinganyeka, kutachikiza nge likumbi limwe nangukapwa helu chikuma.

19 Chamwaza, jino, kachi Mwata nachitavila, Chalumingo nachizaho, echi nachikapwa...Kahajino Ngulinakuya nakuseza, nakuya nakwingila mu Wyoming, na sepa wamwaza; mokomoko kuya ku Idaho, na sepa lyami wamwaza, Ndumbu walunga Miner Arganbright, Ndumbu walunga Clayt Sonmore, vaze Malunga Vakulishitu va Kakusekasana.

20 Mulungu uli nakwizaho, mulungu uli hanyima ya ou uli nakwiza, uli jino; wa 7, Ngwatela kupwa mu—mu Dallas, Texas, Kukuliwana cha Lizu Iya Kukuka. Kaha kuhanjika chami chaufuku chili cha 7. Kaha jino Nangukakinduluka, nakuya ku Idaho na Ndumbu walunga Arganbright na Malunga Vakakulishitu va Kakusekasana. Kaha pamo natukapwa naufuku umwe mu Minneapolis, shimbu kanda etu tufumeko. Kaha jino kulya chachimene chimwe cha Malunga Vakakulishitu va Kakusekasana.

²¹ Ou Mwata ali wakulizanga, Chalumingo nachizaho na chimene Ngwatondo kukinduluka hano ha mbalaka cheka, kaha kachi echi nachipwa chakwitavila kaha nachipwa muchima wa Mwata. Kaha Ngwatondo kuhanjika ha mutwe wachihande wa *Uze Kakundukundu Mukachi Ka Peho*, kachi Mwata Mwata mwetava. Echi chinasoloka kupwa ha muchima wami, mulungu wosena.

²² Kaha chimene chikwavo, chimenemene, pamo fwo koloko ya chimene, Ngwahindukile kaha Ngwapwile nechi chishinganyeka, “Lize likumbi ha kavali.” Kaha Ngwatondo kuhanjika hali echi, chimene chino: *Lize Likumbi Ha Kavali*.

²³ Kaha jino hakupwa nakutanga, echa jino mu Jimbimbiliya, mu Chisoneka, ku Mujimbu wamwaza wa Mukakujila Mateu, ha kapetulu 27. Kaha etu natuya nakuputukila na vasi ya 27 kaha kutanga musuka wa Chisoneka, kumbataho chikuku, kahajino etu natuya nakuputuka haze vene. Kaha hanyima ya kutanga chakutangisa, kahajino etu natuya nakupwa nakulombelela vakakuviza.

²⁴ Kaha, mamalelo, kufuma haze lwola lwamakumishilo hano, nge kukinduluka kunyima, kaha kutwala kumulimo wami wauhya. Ngwapwilenga na maunjiho akukindulukaho amavulu kufuma hakuliwana chize Nguli nawo kuhambakana mukala lwola lwakunyima chikuma.

²⁵ Kuli chuma chimwe hali echi, echi enu munahase kuliwana na muthu, chipwe chipwenga ngachilihi vyaukalunga vyavinene mwasolola. Oloze, talenu, kuka chemanyina ha lufwelelo lwa muthu ukawanyi. Jino, kachi nge muthu ukawenyi ali na lufwelelo...

²⁶ Kaha vakiko navamona, nge, Shipilitu Wajila mwaya mulikungumbuwa na kuhanjika, “*Munganji mukananga* vyuma kusoloka. Kaha, echi, enu muli *ngana na ngana* na lijina. Kaha ove wafuma kuchihela cha *nganji*. Kaha chuma cha *munganji* chikiko ove walinganga. Kaha nachiya nakupwa mujila *eyi*.” Kaha talenu vyosena omwo vinasolokela mujila kaha!

²⁷ Ohonyi, muthu ukawenyi, kutwama kuze, atela kwanduka kaha ngwenyi, “Uze atela kupwa Kalunga. Ngunetavila kuhinduka chami.”

²⁸ Oloze, kachi ngocho, muthu ukawenyi ngwenyi, “Haka mavoko hali yami kaha ngulombelele, mangana Nyuyenga nakuhinduka.” Oloze eyi ikiko jila etu vatunangula muno mu America, kaha, shikaho, kufwelela echi. Kaha echi chinapu punduvene mwaya Jisona.

²⁹ Oloze jino etu tunawane, mu Africa na vihela vya kulisezaseza, kwecha kaha chumachimwe nge ngachize kusoloka, likungumbuwa lyosena kuheta ha lwola lumwe, kwitavila kuhinduka chavo, mwomwo vakiko kavavanangwile chuma chimweko. Talenu? Vakiko kavavanangwile numba

chuma chimweko ha kuka. Kaha jino omwo vakiko navamona echi, vakiko vanatachikiza nge kuli Kalunga uze ayoya. “Kaha kachi Ikiye ayoya, Ikiye—Ikiye apwa wakulitulaho, kaha Ikiye—Ikiye mukakuka.” Kaha echi chili, mwomwo chikuku vachala lyehi, vize vikuku, kupwa Ikiye mukakuka, kaha eji kuka vathu. Kahajino omwo vakiko navamona Kusoloka Chenyi kuzata kuhichila mu Liuka Lyenyi, kahajino vakiko ngwavo, “Mukiko vene. Omu mukiko etu twatondo.”

³⁰ Oloze etu vanatunagula, “kuhaka mavoko hali vakakuviza,” kaha vyuma vya ngachize. Ou ukiko mulonga echi chinazenekela kuzata mwamwaza mu America.

³¹ Jino, anuka, Chalumingo nachizaho nachimene, nge Mwata netavila, Ndumbu walunga Neville mwakaya nakuvilika echi, mukiko vene. Kaha...uze...*Kakundukundu Mukachi Ka Peho.*

³² Jino, Ngwapwanga nakumihana lwola lwalundende mangana mwalumune mu Chisoneka chenu, ku Mateu 27. Echa kuputukila kutanga ha—ha vasi ya 27, ya Mukakujila Mateu wa Mujimbu wawaza. Jino echa twivulile kanawa kukutanga.

*Kaha maswalale ja nguvulu hinavamutwala
Yesu mupeletolyume, vamukungulwile mukana
wamaswalale vosena.*

Kaha vamuzulile, vamuvwikile chikovelo chichila.

*Kaha vavinjile muchama wamingonga,
vamuvwikilewo nakuhaka kumutwe,
vamukamachishile lukosa kulivoko lyenyi. . . lyachilyo:
kaha vamufukaminyine, nakumuhenda ngwavo, vulye,
vulye, Ove Mwangana wava Yuleya!*

*Kaha vakiko vamufwijilile maleji, vamutambwile luze
lukosa, vamuvetelelwo mumutwe.*

*. . . omu valingile hivanamuhende lyehi, vamuzulile
chize chikovelo, vamuvwikile nakuhaka cheka
mahinenyi, kaha vamutwalile kweka mangana
vakamusukike kukulusu.*

*Kaha vakiko hakulovoka, vawanyine muthu waku
Kulene, lijina lyenyi apwile ikiye Shimona: ikiye
vamukwachile mangana ambate kulusu ya Yesu.*

*Kaha vakiko hakuheta kuma, kuze vavuluka ngwavo,
ku Ngolongota, nge ngwavo, ku kayoya,*

*Vakiko vamuhanyine Yesu vinyo vyakufutula na
nyangwa ngwavo anwenga: . . . oloze hakuvimakila,
akanyine kuvinwa.*

*Kaha omu valingile hivanamusukika lyehi kukulusu,
valipangilile kuwala chenyi, hakutahisa na vitaho:
kaha mangana muzalishiwe muze vahanjikile kuli*

kapolofweto, Vakiko valipangilile kuvwala chenyi, kaha hachikuto chenyi valingileho chitaho.

. . .kaha vatwamine nakumulama kuze;

Mulonga. . .wenyi uze vamuhanyine vauhakile helu lya mutwe wenyi, OU YESU MWANGANA WAVA YULEYA.

Haze kuze vene vasukikile vihwanga vavali kujikulusu hohamwe na ikiye, umwe kulivoko lya chilyo, kaha mukwavo kulivoko lyenyi lya chimoswe.

Kaha vaze—vaze vapalikilenga kuze vamusawilenga, na kupyakwojolanga mitwe yavo,

Nakwamba ngwavo, Ove wambile kushiula zuvo yajila, nakuyitunga cheka hamakumbi atatu, jino lilwile ove lyavene. Ngwavo kachi nge Umwana Kalunga, kaha sulukokwo kukulusu.

Mukiko nawa muvamuwendelenga vapilishitu vavalemu, navakakusoneka navakulwane hamwe, ngwavo,

Nalwilinga veka; ivene keshi kuhasa kulilwilako. Ngwavo ikiye Mwangana wava Isalele, asuluke jino kukulusu, numbaetu tumwitavile.

Ngwavo namufwelela Kalunga; kachi nge Kalunga namusake kaha amuyovole jino, kachi nge mwahasa kumuyovola: mwowmo ngwenyi, Ngu Mwana Kalunga.

Navihwanga nawa vaze, vasukikile ku jikulusu na ikiye hamwe, vamutolekelenga na mazu, wowamwe.

Jino kufumisa ha lwola lwa muchitanu na lumwe kulifuchi lize lyosena kwejile milima mbwe na kulwola lwa muchitanu na jiwana.

Kaha kafwe halwola lwa muchitanu na jiwana Yesu atambakanyine nalizu lyakukanguka, ngwenyi, Eli, Eli, lama savakatanyi? nge ngwenyi, Ove Kalunga kami, ove Kalunga kami, ika unangusezela yami?

Kuli vaze vemanyine kuze, vamwe hakuchivwa, valyambile ngwavo, Ou lunga ali nakusanyika Elija.

Kaha linwomu kwalahilile minavo umwe. . . kulaha, nakunona chiponja, achivombekele mvinyo vingangamina, achihakile kulukosa, amuhanyine anve.

Oloze vakwavo vambile ngwavo, mwechenu, tutalenu numba nge Elija mweza na kumulwila.

Yesu, atambakanyine cheka na lizu lyakukanguka, hikwecha shipilitu yenyi.

Kaha jino, lihina lize lyakuvatasana muze muzuvo yajila lyapulikile muwali kufumisa kwilu mbwe

nakumavu; kaha mavu andendele, kaha malolwa apulikile;

...vimbumbembe vyasokolokele; kaha mijimba yavakakujila yayivulu vase vasavalile lyehi tulo hinavavasangula,

Kaha hakulovoka muchimbumbembe omu alingile ikiye hanasanguka lyehi, vengilile munganda yajila, vasolokele kuli vavavulu.

Kaha jino kapitau, navaze apwile navo, nakulama Yesu, hakumona uze mundenda, na vyuma vize vyasolokele, vevwile woma mateli, va lyambile ngwavo, Mwamuchano vene ou apwa Mwana Kalunga.

33 Echa tunongamenu mitwe yetu tando yayindende tulombe.

34 Mwata, etu tunatachikiza nge Ove wapwa Kalunga. Kaha echi. . .Hanyima ya kutanga eli Lizu lyakujila kaha Lyajila, etu chochimwe tuli nakumona nge chisemwa Chove kachalumukile ko. Ove wapwa lwola lwosena Kalunga. Kaha echi chinasoloka nge Yesu kapwile nakuya nakupwa nakuwana ukafweko, nge Ikiye vamutwalile namavoko amapi kaha vamuvatwile muvihanda vihanda, kaha kumufwijila, kaha kumuhenda, kaha kumusukika ha kulusu, kuhita manyinga, kufwa. Kaha kusoloka nge kakwapwile ukafweko, numba kumwe, palanga nomu Ikiye alilile, Lyavene, “Kalunga Kami, Kalunga Kami, mwomwoika Ove unangusela Yami?”

35 Oloze, Ove weji kuzata mukatando nge cheka chauchi nachizata. Etu vatuhana kutachikiza, Mwata, nge kachi tukwechi kala tulwiji vase natuhona kuzauka, kachi etu tuli na jipili tuli nakuhona kuhita, Kalunga ikiye mukaleho atachikiza mwakulingila vyuma vize veka kaveshi kuhasako.

36 Ove yove mukaleho, hali ou mulimo, mwomwo Ove unatachikiza mulonga hali lize likumbi ha Kavali. Ove, kupwa Kalunga, Umwe uze atachikiza lutwe na nyima, watachikijile ino ola nayiza. Oloze omwo lwazachishile, kaha Ove wasolwele Ove wapwa Kalunga. Ove wasolwele Ove wapwa umukulwane. Ove wanyikishile mavu, kaha vakakujila vase vasavalile mumavu valovokele. Ove welavishile musana muufuku, nge milima yaufuku, kusolola nge Ove wapwile Kalunga. Oloze Ove wasoloka kupwa wakuholo chikuma.

37 Echa etu, kufuma hano, tukukulule echi, nge, chikalu tuli nakutambuka mu Shipilitu, vakutwaminyina na livoko lya Kalunga, numba thuhu nachisoloka kupwa chakuhenga, oloze etu tunatale ku Kavali; Kalunga mwaya nakuhanjika mu ola yakwoloka, mulwola lwakwoloka.

38 Jino, Tata Kalunga, etu tuli nakulomba lukonekelo lwa shili jetu na kuzombojoka chetu jishimbi. Etu tunalombo Shipilitu Yove kututwaminyina etu. Tutwaminyine, nge

Katela kutwaminyina mwana Mukoko. Echa etu tupwenga vakwononoka kuli vyosena navituwana, kutachikiza echi, nge Kalunga eji kuzatanga vyuma vyosena kanawa, kaha natachikiza nge echi nachiya mukwoloka.

³⁹ Pwako nayetu lelo mukutanga chino. Etu twalombo nge Ove uyenga nakulwila vaze vali museteko yakupwa mukulwila, kaha vali nakutonda ulwilo. Zalisa vaze na Kuyoya cha Hayamyaka, vaze vali nakutonda changachize. Etu twalombo nge Ove uyenga nakuka vaze vali nakuviza kaha vali nakuyanda, vaze vaneza, nakutonda kuhinduka. Kaha etu natuya nakwalisa Ove hali echi. Etu twalombo echi mu Lijina Iya Mwa Nove, Mulwilo wetu, Yesu Kulishitu. Amena.

⁴⁰ Jino, mukuhanjika chimene chino, etu twatondo kusanyika kwivwulila kuli echi kutanga Ngunasakula kuhanjikaho: *Lize Likumbi Ha Kavali*.

⁴¹ Echi chinasoloka nge nachiya nakupwa chindende chakufuma mungonde; echi nachipwa ha Chitanu Chamwaza. Kavali vatela kuyanuka hakumbi hakumbi. Kaha etu tunayivu chikuma, kuyitanga chikuma. Vakakunangula vananangula hali echi, kufuma kumaputukilo a lwola. Vakakwimba vanembi hali echi, kuhita muvisemunuino. Tupolofweto vachipolofwetele echi, myaka fwo sauzande shimbu kanda echi chisoloke. Kaha tupolofweto valelo vali nakwinyika kunyima omwo chasolokele. Eli linapu likumbi lyalilemu! Lili likumbi limwe lyalilemu hamakumbi osena aze Kalunga atokesele hano hamavu.

⁴² Kaha kachi lili lyalilemu kuli muyachi wamuthu, Kavali, Ngwashinganyeka echi chinapu chamwaza kuli etu kukinduluka kunyima na kulikekesa, kumona kaha omwo chalumbunukila kuli etu. Mwomwo, Nguli wakukunyuka, hayino ola yakuchelewa tuli nakuyoyela, etu tuli nakutonda tonda kulema chosena cha Kalunga echi etu tunatachikiza. Kaha vyosena etu tunahase kuwana, etu tuli hano kulinangula echi, kumona chuma muka chetu, kaha chuma muka Kalunga nalingi kuli etu, kaha kumona chuma muka Ikiye ashikile kutulingila. Kaha echi chikiko twejikwijilanga kuliuka. Ou ukiko mulonga vakakunangula veji kunangulanga, ou ukiko mulonga eji kulinangulanga na kushishika mu Visoneka, na kutondatonda kuhwima, mwomwo ikiye napu ngamba ya Kalunga walikungumbuwa. Kaha ikiye eji kwesekanga kuwana chumachimwe chize nachiya. . . chize mwahanjika Kalunga kuli vathu Jenyi, chumachimwe chize nachiya nakukafwa vakiko. Pamo, chinahase kupwa, chakuvapaisa mujishili javo, oloze nachiya nakuvakafwa kuvakulisa, nge vakiko vahase kuseza shili javo na kukatuka na kuzachila Mwata. Kaha vakakuzata vatela kutonda tonda vyuma kana.

⁴³ Kaha likumbi eli, kupwa lyalilemu chikuma, makumbi amwe amanene, echa etu tutale havyuma vitatu eli likumbi

lyalumbunukila kuli etu. Etu tunahase kumbata jikulukaji. Oloze, chimene chino, Ngunasakula kaha vyuma vitatu vyakuhandunuka, vyuma vyavilemu evi twatondo kutalaho, hajitando jajindende, eji Kavali yalumbunukila kuli etu. Kaha Ngwalombo nge nachiya nakupaisa mukashili wosena ou ali hano; nachiya nakulingisa mukakujila kuya hamambuli eyi; echi nachiya nakulingisa muthu wakuviza wosena kukatula lufwelelo lwenyi kuli Kalunga, na kuya, kuhinduka; mukashili wosena, kulwiliwa; mukakusewuka wosena kukinduluka, na kupwa wasonyi hali lyavene; kaha mukakujila wosena, kuwahilila, na kumbata kwakwachilila na lutilililo lwaluhya.

⁴⁴ Chuma chachinene, chuma chachilemu omu Kavali yalumbunukila kuli etu na kukaye, chili, yeji kukumisa chihula cha shili, kamwe kaha kunahu. Muthu wamuwanine namulonga wa shili. Kaha shili yapwile namulonga uze muthu kahashile kufwetako. Fweto yatohwele chikuma palanga kakwapwile numba umwe ahashile kuyifwetako. Ngwafwelela vene nge Kalunga atongwele jila kana, nge fweto nayikapwa yayinene nge na muthu umwe mwahasa kuyifweta wauchi, shikaho Ikiye kaha nahase kuchilinga, Lyavene. Jino, fweto ya shili yapwile kufwa. Kaha etu vosena twasemukile mushili, vakutungiwa mushili, kwiza kukaye, nakuhanjika makuli. Shikangaho kakwapwile numba umwe muli etu uze apwile wakutela, mokomoko, vakiko kavahashile kuwana umwe hano hamavu uze apwile wakutelako.

⁴⁵ Kaha shili kayaputukile hano hamavuko. Shili yaputukile Mwilu. Lusi-...apwile...Lusifwa, uze liyavolo, apwile wakupaisa kutengeso yosena, ha kuhona kwononoka chenyi, shimbu kanda ikiye azenga nahano ha mavu. Shili yaputukile Mwilu, kuze Kalunga ahaka Vangelo, na vyosena, ha chikuku chochimwe chize Ikiye ahaka muthu kupwa; chinyingi, mutondo wachinyingi, uze mutondo wa Kuyoya na uze mutondo wa chinyingi, kuze muthu nahase kusakula. Kaha omwo Lusifwa vamuhanyine wata, mangana asakule, ikiye atondele chuma chimwe chakuhambakana chize apwile nacho Kalunga. Echi chikiko chaputukile ukalu.

⁴⁶ Kaha kuli chatondekele ha shili. Chatondekele shina kufwa. Kufwa chapwile fweto. Kaha, echi chili, etu natuya mukujindama hali echi, mwomwo Ngwahono kufwelela nge kuli shina kufwa. Kuli Chiyoyelo chimwe. Kaha Ngwafwelela nge muthu uze ali muka Kuyoya cha Hayamyaka keshi kuhasa kufwako. Kaha Ngwafwelela kuli kunonga chikupu cha uze mwono unavulumuna, mwomwo Mbimbiliya ngwayo, "Mwono uze unavulumuna, naukaya na kufwa." Keshi nge muthu; "uze *mwono* unavulumuna." Shikaho, Satana atela kufwa, vakamweke chikupu. Omwo Ngweji kukananga na kakunangula veji kwambanga ngwavo Satana navakamulwila! Ikiye avulumwine, kaha ikiye kaputu ka shili. Kaha mwono

wenyi wavulumwine; kaha ikiye apwile shipilitu. Ize shipilitu nayikaya nakunonga, kupwa nachuma chasalako chauchi.

⁴⁷ Kaha omwo shili yejile hano hamavu, kunyima kukuputuka, nge lilata lilava kuholoka kufuma hano hamavu, lya lewishile mavu. Echi Chambilile tengeso yosena, hano hamavu, kaha tengeso ya Kalunga yosena, mukukashiwa. Muthu apwile mwishi ya kukashiwa cha kufwa, misongo, maukalu, maushona. Kaha chiyoyelo chosena chaholokele. Shili yapwile naulembe wa kulewisa mavu. Kaha jino etu vatwamishile muno, vakuhona litalililo, mwomwo tengeso yosena hano hamavu yakulihana kuchikiko. Kaha wosena wakusemuka hamavu apwile wakulihana kuchikiko.

⁴⁸ Shikaho, yatela kwiza kufuma Kuchihela chimwe chakuzeneka shili. Echi kachejile chakufuma hano hamavuko. Umwe wethu kahashile kutusokola umweko. Chatela kufuma kuli Weka.

⁴⁹ Shikangaho, omwo muthu atachikijile nge ikiye wakuhanduka kufuma kuli Kalunga, ikiye ejile nakupwa ndala muhitanganyi. Vakiko valilile. Vakiko valilile. Vakiko vamwene makava. Vakiko vahitanganyinenga, kuhita mujipili na kuhita muvyana, kutonda Mbongi ize mukakuyitunga na kuyitenga apwile Kalunga. Mwomwo, ikiye atachikijile nge kachi nge ikiye apwile kunyima ya Kusoloka cha Kalunga, ikiye ahashile kuchihanjika hali Ikiye. Oloze kakwapwile jila yekako yakukinduluka. Ikiye ejile nakupwa wakujimbala. Ikiye katachikijileko jila muka yakwalumuka, shikaho ikiye apwile kaha, wakukimbwojoka, kweseka kuwana kumwe kuze ikiye ahashile kuwana jila yakukinduluka kuli chize Chihela. Chumachimwe mukachi kenya chamulwezele nge afumine ku—ku Chihela chize chapwile chakukupuka. Kakweshi numba muthu umwe hano muli eli lizavu, chimene chino, mokomoko muno mulizavu hano tambo yamalayiti, kuze kuli nakuya nakujinguluka mukaye kosena, kuze kakweshi umwe hano, mokomoko kumwe, oloze kutondatonda chize chakukupuka.

⁵⁰ Enu mwatela kufweta mutelo, mwashinganyeka, “Echi nachiya nakukuma.” Omwo naufweta mitelo yenu, kahajino kuli mthuumwe ali nakukola muchisaka chenu. Omwo misongo nayimikwata, kahajino enu mukwechi mitelo mwatela kufweta. Chuma chatete mwatela kutachikiza, jikambu jenu jili nakwalumuka ngengu, kahajino enu mwatondo kukinduluka nakupwa vanyike cheka. Kaha kuli chuma chimwe lwola lwosena, lwola lwosena, kaha mwomwo ya eli likimba lya shili. Oloze mukachi kamuchima wove, mwomwo enu mweji kutondatondanga chize, echi chinasoloka nge kuli Kukupuka kumwe. Kumwe, kuli chumachimwe.

⁵¹ Ou ukiko mulonga, lwola lwaluvulu, lelo, nge mukashili achili nakukimbakimba. Wamwaza, mukweze wapwevo

mwaya nakuvatula mambongi ajikambu jenyi, mangana apwenga napuho; kukwita ulombo kumeso enyi, mangana asoloke wamwaza; kuvwala uvwalo wakusolola tengeso yamujimba wenyi. Mwomwo, echi chili kaha chuma chimwe nge ikiye mwawana, kuwana kumwe mweseka kuwana chumachimwe nachikinduluka kuli ikiye, omwo ikiye nahase kulingisa malunga kumulinga chitoli, nakumunyekesela livoko, nakuseha nenyi. Mukweze walunga mwaya nakulinga chuma chochimwe kuli uze pwevo, kweseka kulilingisa lyavene wakumukoka. Valihata navaya nakutunga zuvo, nakuyihaka mujila yimwe, mwomwo nayila nakusoloka mujila yimwe yamwaza kuhambakana uze alihata nenyi. Elu lunapu lwola, etu tuli nakutonda chumachimwe, kaha chumachimwe chatwalileho kuya chindende nge echi chahelu. Uze mukweze wapwevo wakalemesa mwaya nakuwana mukwavo mukweze wapwevo wakalemesa ali wapuho kuhambakana ikiye. Uze alihata nenyi mwaya nakuwana zuvo ili nakusoloka kuwaha kuhambakana ikiye. Uze pwevo mwaya nakuwana pwevo mukwavo navwale mujila yimwe, ize ili nakusoloka kanawa kuhambakana omu ali ikiye.

⁵² Echi chili chumachimwe muli etu, echi chili nakutondatonda chuma chimwe, kaha echi chinasoloka nge etu twajimbala. Etu twatondo kuwana chumachimwe chize nachiya nakutuneha kusuwuluka, chize nachiya fumisa ize zala, oloze chasoloka nge katweshi nakuyiwanako. Vathu vesekele muvisemunuino vyosena. Vakiko valile hali echi. Vakiko valilile. Vakiko valingile vyuma vyosena vize vakiko vatachikijile mwakulingila, oloze hanga vahonene kuwana, kukimbakimba mukaye kosena.

⁵³ Makumishilo, likumbi limwe, lize lize likumbi ku Kavali, kuze kwapwile Umwe ejile nakushikumuka kufuma mu Upahu. Umwe, na Lijina Iya Yesu Kulishitu, uze Mwana Kalunga, Uze ejile nakufuma mu Upahu, kaha Kavali yatungikile. Lize likiko likumbi fweto vayifwetele, kaha chihula cha shili chakumine hayamyaka. Kaha echi chasokolwele jila muli echi chuma tuli nakwivwa zala na lipwila. Echi chanehele chihela chakusuwuluka. Kakweshi muthu numba umwe ayile lyehi ku Kavali, kaha kumona mujila kana yapwile, muze yapwile chochimwe. Vyuma vyosena ikiye azangile mokomoko asakile, chaliwanyine, omwo ikiye ahetele kuchihela kana.

⁵⁴ Eli lyapwile likumbi lyalilemu, kaha kupwa chuma chachilemu, chize chanyikishile kaye. Chize chanyikishile kaye, nge kanda lyehi vakanyikise. Omwo Yesu afwile ha Kavali kaha afwetele fweto ya shili, aka kaye kashili kapwile kwawi. Musana kayile mukachi ka likumbi, chapwile na kusoloka. Kaha malolwa alinyikishile, jipili japulikile, kaha mijimba yakufwa yapulikile kufuma mufuka.

⁵⁵ Chuma muka chalingikile? Kalunga amuhetesele haseteko, ha Kavali. Ikiye alemekele uze kanyama vavuluka Satana, haya

myaka. Jino ikiye apwile wakukenyuka kufuma haze, mwomwo chanehele Kumunyika kuli vathu. Kaha vosena atachikiza nge uze kanyama vamulemekele apwa wakukenyuka, kukalava na nyima nyakuhokoka. Jino, Satana vamwandumwine hamavu, ha Kavali. Mavu ejikijile nge ikiye vene.

⁵⁶ Fweto yayinene ize vafwetele lyehi, kaha Umwe kaha uze ahashile kufweta, kwiza nakuchilinga ku Kavali. Aha hakiko hali fweto ize vafwetele. Echi chuma chimwe havyuma kana. Kalunga achitonda echi. Kakweshi muthu apwile waktela. Kakweshi muthu ahashile. Kakweshi muthu ahashile kuchilinga. Kaha Kalunga ejile, Lyavene, kaha apwile wakutungiwa muuthu, kaha ayoyele muchiyoyelo chauthu, kupwa mwishi ya kufwila chamuthu, kaha vamusukikile ku Kavali. Kaha kuze, omwo Satana ashinganyekele nge Ikiye keshi kuhasa kuchilingako, Ikiye kahashile kuhita muli chizeko, Ikiye ayile nakuhita mu Ngesemane kaha cheseko chosena chize kala muthu nahase kwimana. Ikiye ahichilemo nge kala malunga, oloze Ikiye afwetele ndando.

⁵⁷ Kaha chize chikiko chelavishile ha mavu. Chapwile nge kulewisa, ha kuvapasulu. Omwo ndotolo eji kuhananga muthu ndongo ya kulewisa, ikiye chatete eji kumulewisanga, shimbu ikiye nahase kulinga. Kaha omwo Kalunga ejikuhanga ku—ku pasula ha Liuka, aka Kaye kali ka kulewisa, chisemwa chili na kutunya. Shikangaho! Kalunga, mumusonyi wauthu, apwile nakufwa. Luze lwapwile lwola kaye kapwile nakuvandamina, oloze vavavulu kavatachikijileko.

⁵⁸ Nge omu chili lelo, vavavulu vanatalilila vyuma kana, oloze vakiko vahonene kumona. Vakiko vahonene kutachikiza jila yakulovoka. Vakiko vachili nakweseka kutondatonda chiseke na vyuma vya kaye, kweseka kuwana jila javo.

⁵⁹ Kwapwile, kunapunga vinjikizo vyavivulu vize vyenyikile kuli lize likumbi, miwimbimbi yayinene yayivulu. Chize chinapu muvimbimbi wa mwana mukoko hali chizamba, nahali kapeza, kaha vyuma vyosena, oloze kachahokwele chizeko. Echi kachahashile kuhokola chize kukwata chakufwa, kuze Satana apwile na mavu.

⁶⁰ Aze malolwa atambukileho, kukanduka na kushikumuka hano hamavu, kuwema nge mulilungu! Lusifwa apwile mwana chimene kaha ikiye atambukile ha mavu omwo kwapwile kuyengunuka. Aze malolwa oamwe aze apwile hinawahola, omwo Yesu afwile ku Kavali, kuukula hamavu.

⁶¹ Ize ndando afwetele, kaha kukashiwa cha Satana chapwile chakuhokoka. Kalunga ahakile cheka mumavoko amuthu, jila yakukinduluka kuli chize apwile nakutondatonda. Ikiye kapwile nakulila chekako. Vamuvetele, omwo Ikiye ahokwele nyima ya Satana, kuze ku Kavali, ize nyima ya shili, ya kuviza! Kaha chaneha kala muthu wanyama, ha mavu, kunyima

Kumeso a Kalunga, na shili yakukonekela. Haleluya! Jishili jetu vanajikonekela. Kakweshi cheka Satana kutwilavisa kufuma kuli Kalunga.

⁶² Kuli jila vanatungu. Kuli shinga yinatwame kuze. Kuli tambo ya ku Upahu, kuneha muthu wosena wakuheta kuli ize tambo. Kachi muthu ali wakuzala na shili, kaha chamununga nachikuku. Ikiye nahase kutukonekela ize shili kana. Keshi ngocho kahako, oloze ize shili vayifweta lyehi. Mamalelo! Enu kamwatela kuhanjika, “Kangwatelamoko.” punduvene, kawatelemoko, kaweshi kuhasako. Oloze watela Umwe ambachile chihela chove. Ove uli wakukasunuka. Enu kamwatela kupwa nakulikomokela chekako. Enu kamwatelako kupwa nachiseke kutonda muthu muno mumavu.

Mwomwo kuli kaselwoke na zale na Manyinga,
Wakufuma mu mishisa ya Emanuwele,
Kuze kuli nakujiminyinanga vakashile mwishi
ya livaji,
Kujimbalisa kupaiwa chavo.

⁶³ Enu kamwatela kujimbalako. Kuli likulakula jila, kaha Jila, kaha eyi vayivuluka kupwa Jila yava kakuji. Vaze vazeneka kupwa vatoma vinakuvahita helu. Mwomwo, ikiye ejile kuhichila muli kaze kaselwoke, chatete, kaha jino ikiye kwingila mu likulakula jila.

⁶⁴ Ikiye ahokwele jingolo ja Satana. Ikiye asokwele vikolo vya ku hetese, kuli kala muthu uze vasokelemo, hano hamavu, mujitolongo, kwivwa woma nge omwo afwile, omwo kufwa chamulingile. Ha Kavali, Ikiye asokwele vize vikolo, echa mangana wosena ayenga. Enu kamweshi kamwatela cheka kumipula pula chekako kushili. Enu kamwatela cheka kwaha vilyo vyenu kushiliko, kunwa wala, kunwa makanya, kusekasana chawiji, kwambulula makuli. Enu mwatela kupwa vakushishika, wakwoloka, kaha wakusungama. Kaha Satana keshi kuhasa kulinga ngaho chuma chimweko, mwomwo enu mwatela kukwachilila kumukana, mukana wa Kuyoya chize chazamina mu Lilolwa Iya Visemuino. Kakweshi chuma nachikunyikisa kufuma kuli Echi ko. Chipwe jipeho kukunyisa kufuma kuli Echi ko. Kakweshi chuma, numbathuhu kufwa chivene, kutuhanduna kufuma ku zangi ya Kalunga eyi ili muli Kulishitu Yesu. Omu mukiko Kavali yalumbunukila.

⁶⁵ Malunga vaze vapwile muundungo vavakasunuine. Malunga vaze vapwilenga mwishi ya woma wakufwa kavahashile cheka kwivwa woma wakufwa. Lunga uze eji kutondatondanga Mbongi, yikwechi mukakuyitunga na nakuyitunga, Kalunga, ikiye emanyine muli kulakula jila, kaha nakuhaka meso kutalisa Mwilu, mwomwo ikiye apwile wakukasunuka. Haleluya! Ikiye ali wakusokoka. Ikiye katondekele kukimbakimba cheka, mwomwo kuli jila ya kutachikiza nge uli wakwoloka

mokomoko chiku. Kalunga eji kutuhananga Kuyoya. Jishili jetu jinanyi. Lize likumbi ha Kavali kufweta ndando. Omwo etu twamwenenga vyosena vize, shikangaho uze mukakusoneka asonekele:

Malolwa kupulikisa na kwilava mwilu
 Mulwilo Wami kunongama mutwe Wenyi na
 kufwa.
 Kufukununa lize lihina lya solwele Jila
 Kuwahilila cha Mwilu na likumbi lyakuhona
 kukuma.

⁶⁶ Apalahama kapwile wakukimbujoka chekako, kuhita lifuchi lyosena, kutondatonda mbongi. Mukashili katela kukimbujokako cheka, nge ikiye nahase kupwa wakulwiliwa mokomoko chiku. Muthu mukakuviza katela kukimbujoka nge nahase kuhinduka mokomoko chiku. Lihana lya kufukunuka, halikumbi lize ha Kavali, yasolwele Jila yakuheta kukuhasa. Kalunga etuhanyine jingolo ja Shipilitu Yenyi, kuyoya nakuhasa vyuma vyosena; kutulomba etu kufwelela. Echi chasolokele ha likumbi lize ha Kavali. Kuze kwapwile likumbi lya ngachizeko. Kaha kakweshi limwe nge ngachize. Echi kasheshi chakutamo chekako. Ndando vayifweta lyehi, kaha etu vatusokola lyehi. Ngwasakwila kuli Kalunga! Etu vanatusokola. Kakweshi cheka ove kukimbujoka. Kakweshi cheka kujinuoka hali echi. Echi chosena vachimbata lyehi. Lize chiwuva chafumishile lize lihina yakuvatasana, kaha etu vatuhaka muli kulakula jila, keshi kupwa nakukimbujoka chekako, oloze kufwelela na kutambuka mwakulonga. Etu twatela kutambuka mwakulonga Kumeso a Kalunga.

⁶⁷ Apalahama atachikijile, kaha veka nawa vatachikijile, shimbu vakiko vapwile nakutondatonda Mbongi, vakiko vatachikijile vakiko nge vafumine Kumwe. Chuma chimwe chinasoloka. Vakiko vapwile nakuyoyela ha mavu akalepa. Mindenda yejile. Nyamanganda jejile. Jijita na kujihajiha! Kangunge na mwana mukoko kulila hamwe, mokomoko kangunge kulya mwana mukoko, kaha ndumba kulya ngombe. Echi kachasolokele kanawako. Kuli chuma chimwe chakuhenga. Ikiye atachikijile nge kwapwile chumachimwe chakuhenga. Malunga na ndumbu kujiha ndumbu; tata kujiha mwana walunga, mwana kujiha ise. Kuli chumachimwe chakuhenga. Ikiye ali na kukula. Ali nakufwa. Ikiye ali na kuzuza. Misongo ili hali ikiye. Ikiye ali muundungo. Mitondo ili nakukola, oloze keshi wakuzeneka kufwako. Vakiko vali nakufwa. Jipili jili nakukwalumuka. Tulungalwiji kuma. Meya kuhona. Kuli chumachimwe chinahenge. Kaha ikiye ali nakutonda chihela, Mbongi yize evi kavyasoloka chekako. Ikiye atachikijile, kachi nge nahase kukinduluka kuyima Kumeso ya Umwe uze achilingile kupwa chakwoloka, ikiye nahase kuhanjika echi kuli Ikiye.

68 Mamalelo, lisesa kana, mukashili, mukiko chili, chimene chino, kutachikiza nge enu mukwechi Jila jino. Lize likumbi ha Kavali jila yasokolokele. Vaze vosena vakakuluka vahangasanyine na kutonda, chize Kavali yatuhanyine, kukasunuka. Kaha ove muya ngachilihi nakuhonesa echi? Kaha ove muya ngachilihi nakuhonesa echi, kulinunga na chikungulwilo? Kaha ove muya ngachilihi nakuhonesa echi, kushishisa chumachimwe hali echi, viseke vya kaye? Mwomwoika nauhona kwitavila evi? Kufukununa cha lihana chaneha muthu cheka kunyima Kumeso a Kalunga, chakuzeneka shili hali ikiye, kukala chuma. Kaha ahaka jila kumeso aikiye, kuli chuma chize ikiye ali nakutonda: Melu, upahu, kuunda, Kuyoya cha Hayamyaka, vyuma vyosena kupwa kumeso aikiye.

69 Lize likumbi kwapwile chize—chize kufwa kushijika ngolo ja Satana. Echi chakumishile vyuma vyosena.

70 Kaha Nguli nakumumona Ikiye kuze; Ikiye apwile mu Milemba ya mwana mukoko, kufuma kumuvwimbimbi watete kuze wafuminyine.

71 Omwo Avele, ha lufwelelo, ahanyine kuli Kalunga mulambu wamwenemwene kuhambakana wa Kena, ikiye pamo akasile nge—nge grapevine hashingo ya mwana mukoko, nakumukoka ha malolwa. Ambachile nge—nge lilolwa mulivoko lyaenyi, kupwa chitwa, kaha akokele mutwe wenyi waundende hanyima, kaha na kutapa na kumujaha palanga nakukufwa. Kaha ungoni wenyi kusana na manyinga eyi ivene. Ikiye kulyalanga mu manyinga eyi. Chize chapwile muvimbimbi.

72 Oloze ha likumbi ha Kavali, kuze kakwapwile mwana mukoko wakufwana ngana hano hamavu ko, oloze apwile mwana Mukoko wa Kalunga, uze apwile nakufwa, kulyalanga mu Manyinga Eyi Ivene. Ikiye vamuvatwile, na kumutuva, kaha kumuveta, na kumufwijila, nakumuveta, kaha kumuveta mbanda, na vyuma vyosena, ku kaye, kaha Manyinga kuhita nakupwelumuka kuhichila ku mambongi Eyi.

73 Omwo mwana mukoko wa Avele afwile, afwile, kuhanjika mulilimi lize Avele ahonene kwivwushisa. Apwile na teta.

74 Kaha omwo mwana Mukoko wa Kalunga afwile lize likumbi ha Kavali, Ikiye ahanjikile mulilimi lize naumwe pimbi ahashile kumwivwushisa Ikiye. “Kalunga Kami, Kalunga Kami, mwomwoika Ove wangukanyina ika Yami?” Apwile mwana Mukoko wa Kalunga, vamuvatwile muvihandavihanda, nakumutuva.

75 Ikiye apwile vene mwana Mukoko uze Avele uze apwile muvishinganyeka, omwo ikiye amwene Mbutu yalushiko yauze pwevo. Ikiye apwile mwana Mukoko uze Ndanyele amwene, lize vakekumwine kufuma kupili, chakuzeneka mavoko. Ikiye apwile Lifumbo mukachi ka lifumbo, hakupwa kapolofweto.

Vakiko vosena vamwene lize likumbi omwo lyalumbunukile, lize likumbi ha Kavali. Echi chanehele chuma chachinene. Echi chahokwele nyima ya Satana.

⁷⁶ Chatete, etu twatela kutonda kulumbunuka cha lize likumbi. Chamuchivali, etu twatela kumona lize likumbi linalingi ika kuli etu, jino, ika lyatulingilile etu. Jino, chamuchitatu, echa tutale vika twatela kulingingila lize likumbi. Ika twatela kulinga?

⁷⁷ Chatete, etu twatela kutala muli chize, mwomwo eli lili likumbi lyalinene, lyalinene kuhambakana makumbi osena. Ndando ya shili yakumineko. Satana ngolo jenyi vajihokwele.

⁷⁸ Kaha jino etu twatondo kumona chuma muka twatela kulinga mukushishisamo. Jino, mukushishisamo, omwo Yesu afwile ha Kavali, ha Kavali lize likumbi, Ikiye keshi kafwetele kaha ndando ya kufweta ya shili jetu kahako, oloze Ikiye afwetele ndando na kutunga jila ize etu twatela kumukavangiza Ikiye; mwomwo etu, nge Alama wakulimbuka uze vanasokola. Nge omu Shipilitu amutwaminyine Alama (Alama watete) ha Shipilitu, uze apwile na kutwaminyine chisemwa chosena, kahajino etu (Alama wamuchivali), mokomoko vaze malunga vahamavu vanasokole kuli Kulishitu, kufuma ku lize likumbi ha Kavali, vanahase kumukavangiza Ikiye. Jino, omwo Ikiye afwile ha Kavali, Ikiye atungile jila. Ikiye ahanyine Shipilitu, Shipilitu Wajila, uze atumine Echi kunyima ya mavu, chayove na yami Nanguyoyela hali echi. Echi chikiko kulumbunuka cha Kavali kuli etu, kumukavangiza Ikiye.

⁷⁹ Chatete, tala muli echi, mona ika yalingile. Kaha jino twatela kulinga ika mukulemesa echi? Chuma muka ove na Yami twatela kulinga?

⁸⁰ Jino, ngwetu, “Chamwaza, Nguna—Nguna sakwilila echi. Echi chamwaza chikuma.” Oloze etu twatela kwitavila echi. Kaha kwitavila echi, kwitavila Uthu Wenyi, Kulishitu mukachi kamuchima yetu.

⁸¹ Kahajino, etu tuli vakukasunuka kufuma kushili, shikangaho kakweshi mizelele ya shili yakusukama kuli etu, numba mumweko. Kalunga, nge kanda lyehi tuvulumune shili, Mulambu wakukupuka vauhanyine kuli etu. Mwomwo, Yesu ngwenyi, “Pwako wakukupuka, nge omu Senu wa Mwilu apwa wakukupuka.” Kahajino, kakweshi chuma chimwe chekako, oloze etu tunapu wakukupuka Kumeso a Kalunga.

⁸² Jino, haze hakiko tweji kujimbalisanga chihela chetu. Kachi etu katweshi nakutala, etu tweji kwesekanga kutala kunyima kuze twapwile. Kaha nge natutala kunyima kuze twapwilenga, uze Mulambu kulumbununa nge keshi chumako kuli etu. Mamalelo, kamweshi nakumonako echi, liuka? [Chikungulwilo ngwacho, “Amena.”—Muka.] Kangweshi numba. . .Kangweshi kweseka mulimo. Kangweshi, chipwe enu. Kakweshi nakutondewa kweseka. Enu mwajimbala,

kukuputuka, kachi kaha nge namutala kuli chize ove unalingi. Oloze kanda kutala kuli chize ove unalingiko.

⁸³ Tala kuli lize likumbi ha Kavali lyalingile kuli ove. Chize chafwetele ndando. Chize chakumishile chihula. “Shili jenu numba jipwenga jichila; najipwa jitoma to nge vula yachishika. Jichila ngengu; nge mangona amikoko.” Kahajino enu kamweshi na shiliko. Enu muli vakukupuka chakuzeneka shili. Numbathuhu chuma muka unalingi, mokomoko ocho ove unalingi, ove uli kaha wakuzeneka shili. Kachi kaha nge ove unamwitavila Yesu Kulishitu nge Mulwilo wove, shili jove vanajikonekela. Kalachuma chosena *vanajikonekela* “vanajimbangana na kujikonekela.”

⁸⁴ Kahajino yeji kulinga ngachilihi? Echi cheji kukuhana, hanyima ya seteko ya chiyoyelo, Shipilitu Yove, kumukavangiza Ikiye, kaha nakulinga nge omu Ikiye alingile, mwomwo veka vali nakukavangiza. Ikiye apwile kupwa umwe Muthu, uze Muthu wakukupuka. Ikiye ahanyine chiyoyelo Chenyi, kaha Ikiye atungile chakutalilaho enu. Jino twatela kulinga muka?

⁸⁵ Jino, chuma chatete Ngwatondo kuhanjika, chili, Yesu aliyoyelele Iveneko. Kuyoya Chenyi hachihanyine hali veka nawa. Echi chikiko, mwakukupuka, Kuyoya cha Hayamyaka. Omwo ove muhanjika kuliuka, kaha ove mulinga chuma chamwaza, echi chamwaza. Oloze omwo ove muyoya chiyoyelo chove kuli ove lyavene, kaha kaweshi na Kuyoya cha Hayamyaka. Kuyoya cha Hayamyaka, chili kuyoyela veka. Echi chili chakwinjikiza omwo nachiza Echi kuli mwana Mukoko wa Kalunga. Ikiye ayoyele, kaha apwile na Kuyoya cha Hayamyaka, mwomwo Ikiye kayoyelele Lyavene. Ikiye ayoyelele veka. Kaha enu tambulenu Kuyoya cha Hayamyaka, ha kutambula lize likumbi, kaha enu kanda kuliyoyela ove lyaveneko cheka. Enu yoyelenu veka.

⁸⁶ Muthuumwe ngwenyi, “Ove nawimana ngachilihi, echa kala muthu akusanyike na majina amapi?” Enu kanda kuliyoyela ove lyaveneko. Enu yoyelenu veka, mangana muhase kusokola uze muthu. Enu munapu vana va malunga. Kaha ukalu uliho uli, liuka linavulyama nge vakiko vapwa vana va malunga. Enu mwapwa vana va malunga. Enu muli nakumbata chihela cha Kulishitu. Enu muli vana va malunga, shikaho kanda kuyoyela ove lyaveneko. Yoyela veka.

⁸⁷ “Chamwaza, Ndumbu walunga Branham, Ngunahase kuyoyela *ou* ndumbu walunga, mwomwo ikiye pundu apwa muthu wamwaza.” Echi kacheshi chikikoko.

⁸⁸ Yoyela uze muthu uze akujinda ove. Yoyela uze muthu uze mwakujihia ove kachi vakiko vanahase. Muze mukiko valingile na kuli Ikiye. Vakiko vamujihele Ikiye, kaha Ikiye afwile, mangana Ikiye avalwile vakiko. Chize chikiko Kuyoya cha Hayamyaka. Omwo, enu, echi chili mutulo yove, ove uli na

kutalisa Mwilu. Oloze enu mweji kulambulanga vyuma vyenu, vahanenu, nge mukoko eji kuhananga ungoni wenyi. Enu talenu jino, kutalisa ku Kavali.

⁸⁹ Ngwafwelela echi nachimikafwa enu hakwingila muchihela. Eyi ikiko mbalaka, mukiko vathu vosena, mukiko vatela kulinga, kuwana ove uli hiya, kaha pungu muka. Liuka, keshi kuya kahako kuliuka na kwimba myaso, kwimba myaso. Liuka lili chihela cha kwolola. “Kusopesa chatele kuputukila muzuvo ya Kalunga.”

⁹⁰ “Etu twatela kulitachikiza etu kupwa vakufwa kuli etu vavene, na kuyoyela muli Kulishitu.” Kahajino, Ikiye atungile jila ize etu tunahase kulambula etu vavene kukuzata mulimo Wenyi, kumukavangiza Ikiye. Kachi etu natumukavangiza Ikiye, etu natutwaminyina chiyoyelo chize Ikiye ayoyele. Echi chamwaza.

⁹¹ Yesu ngwenyi, kaha hanjika hali echi. Echa ngumihane enu vyakutanga hali echi. Ivwililenu chikuma. Kanda kujimbalisa echiko. Yesu ngwenyi, ha Likumbi lize Ikiye mwakahandununa vathu, nge mikoko na va pembe. Kaha Ikiye mwakaya nakuhanjika kuli vapembe, “Imanenu kusali ya chimoswe.” Kaha kuli mikoko, “Imanenu kusali ya chilyo.”

⁹² Kaha Ikiye kuhanjika kuli va pembe, “Fumenu kuli Yami. Mwomwo, Ngwapwilenga na zala, kaha enu Kamwangulishilengako. Ngwapwile mukamenga, kaha enu Kamwanguutambukilileko. Ngwapwile uselesele, Kamwanguvwikileko. Ngwapwile na pwila, kaha Kamwanguhanyineko meya akunwa. Ngwapwile nakuviza, kaha enu Kamwanguutambukilileko. Shikaho, fumenu kuli Yami.”

⁹³ Kaha kuli mikoko, Ikiye ngwenyi, “Ngwapwile na zala, kaha enu Mwangulishilenga. Ngwapwile uselesele, kaha Mwanguhanyine uvwalo. Ngwapwilenga nakuviza, kaha enu Mwanguzachilile.”

⁹⁴ Kaha talisenu. Kanda muhonako kumbata echiko, liuka. Lamenu echi mumichima yenu, haya myaka na myaka. Echi chapwile vene chakuzata mukuhona kutachikiza! Vathu kavachilinga ko mwomwo ya kupwa hamulimo. Muthu mwakuhana chumachimwe chikwavo, mwomwo ikiye atela kulinga echi, muthu mwakulisa ove mwomwo ikiye atela kulinga chize, ikiye akwechi chishinganyeka cha shili. Echi chatela kupwa chiyoyelo chove vene, chilinga chove vene.

⁹⁵ Echi chapwile chakukomoka kuli mikoko, vahanjikile ngwavo, “Mwata, lwola muka Ove wapwile nazala? Kaha etu twahonene kukulisa Ove. . . Lwola muka Ove wapwile nazala, kaha etu natukulisa Ove? Lwola muka Ove wapwile uselesele, kaha etu natukuhana Ove uvwalo? Lwola muka Ove wapwile na pwila, kaha etu natukuhana Ove kunwa? Lwola muka Ove wavijile, kaha etu natukuzachila Ove?”

96 Echi chapwile kaha chakufuma mu zangi, kupwa kaha Kuyoya Chove muli vakiko. Kalunga, echa vathu vamone chuma muka Kavali inalingi hali etu, chakulingiwa lyehi.

“Lwola muka Ove, Mwata? Etu katwatachikijile echiko.”

97 Tala omwo Yesu alumukile na kuhanjika, “Omwo enu mwachilingile hali ava, mwachilingile kuli Yami.”

98 Kuyoya cha uminyinyi; keshi chishinganyeka chamuchivaliko. Keshi kushinganyeka hali chizeko; oloze enu muli vakufwa kuvyuma vya mu kaye, kaha shikaho mwayoya muli Kulishitu, kaha shikaho muli nakutambuka muli kukula kula jila, kaha vyuma kana vili kaha vyakulingika lyehi. Enu chilingenu kaha echi. Keshi kuhanjika kahako, “Chamwaza, jino, Mwata mwakaya, Mwata, watondo yami ngulinge echi.” Echi kacheshi chizeko. Enu muli kaha chihanda cha Ikiye. Shipilitu Yenji ili muli enu, kaha enu namulinga mujila Ikiye alingile. Ha! Mbatenu echi.

99 “Kuli jila yinasoloka kupwa yakwoloka kuli muthu, oloze makumishilo yacho yinapu jila ya kufwa.”

100 “Keshi vosena navahanjika, ‘Mwata, Mwata,’ navakaya nakwingilamoko, kuvangila vaze navaya nakulinga mwaya muchima Tata Yami,” chakufuma kumichima yavo, chawana kaha.

101 Jino, lize likumbi ha Kavali vafwetele ndando, shikaho etu twatela kupwa mujila.

102 Kanda kuhanjika, “Munatachikiza, tuliwe ya Jones lwola lumwe apwile...Ikiye afumine mumakala, kaha Ngwayile na kumulanjila makala. Nangumilweka, Ngwamwene ndumbu walunga uze atondele suti yakuvwala, kaha Ngwayile na kumulanjila suti yauvwalo. Vamukisule Kalunga! Ngwapwa Mukakulishitu.” Mamalelo, yami! Enu vakauminyi, vakakuhutwa, vathu vakumona lupi. Enu vakakulyonga.

103 “Kanda kwecha livoko lyachilyo kutachikiza ovyo chimoswe ali nakulingako, chipwe chimoswe kutachikiza ovyo chilyo ali nakulingako.” Shina kupwa kaha wakufwa muli Kulishitu, palanga nomu namuchilinga, mwosena omwo. Echi chinapu chinsemwa chenu. Echi chinapu chakufwanyisa. Enu mweji kuchilinganga, mwosena omwo. Echi chili kaha Kuyoya chize chili nakuyoyela muli enu. Enu muli kaha vakulihana kuli eyi Shipilitu, kaha Ali nakuyoyela Ivene muli enu. Mamalelo, enu muli nakwivwa chize kukisula cha Shipilitu, echi chikiko Kuyoya! “Keshi yami ngwayoyako,” ngwenyi Paulu, “oloze Kulishitu ayoya muli yami,” chili kaha chakulingika lyehi.

104 “Chamwaza, Nangumilweka, Ndumbu walunga Branham, etu tu Vakakulishitu hano. Etu tweji kukafwa *ava* vathu. Etu tweji kuvakafwa *vakiko* vathu.” Mamalelo, Yami! Sonyi hali enu. Echi kacheshi Ukulishituko.

¹⁰⁵ Ukulishitu uli kaha wakulingika lyehi. Echi chatela kulingika. Kaha enu vulyamenuko kaha hali echi, vyosena, “Kangweshi.” Kuya, nakuchilingako.

¹⁰⁶ Kulishitu hanyine kaha chiyoyelo Chenyi kuli Kalunga. Ikiye ali hanyine Lyavene, kupwa ngamba walikungumbuwa, kuli vathu. Ikiye ahanyine chiyoyelo Chenyi, chawana. Ikiye katelele kuchilingako. Ikiye kachilingile halushishiuko. Ikiye kahanjikile ngwenyi, “Jino, vandumbwami, enu vosena mwatela kungushinganyeka Yami, mwomwo Nguneza nakumifwila.” Ikiye kahanjikile numba lizu hali echiko. Ikiye afwile, mwosena omwo, mwomwo apwile Kalunga muli Ikiye.

¹⁰⁷ Ali Kalunga muli enu, ali Kalunga muli yami, ali nakutulingisa kusoloka nge veka. Mukoko, kusali yimwe.

¹⁰⁸ Umwe wavo mwaya nakuhanjika ngwenyi, “Chamwaza, Mwata, Ngwalingile *echi*. Kaha, Mwata, Ngwalingile na *chize*.”

¹⁰⁹ Ikiye ngwenyi, “Fumenu kuli Yami, enu vakakuzata mwaupapwoke. Kangwamitachikizako.”

¹¹⁰ Kachi liuka nalihasa kwiza kuchikuku chakufwana ngana, echi keshi chumachimwe enu mwatela kulingako, enu zatenu enu vavane kuli echi. Echi chili chumachimwe chasemuka kuli enu.

¹¹¹ Ngukonekele yami, enu masepa va Chipendekosita. Ngwapwa chipendekosita. Oloze masepa va Chipendekosita mwatela kuwana, kuli echi chatela kupwa nge–nge mwaso walumbushi, kuveta lizavu limwe, mokomoko kusakwilila mavoko, mokomoko tungoma, nakuneha mutambi. Echi chinapu kwivwa kaha. Vakiko veji kuhema mulizavu shimbu kanda vakiko kuya kujita. Vakiko veji kumbatanga mukwivwa cha mujita. Ngwafwelela mukwimba. Ngwafwelela mukusakwilila mavoko. Oloze Ngwafwelela muli evi vyuma. Echi chinapu muchano. Etu twatela kupwa nachize.

¹¹² Oloze enu mwaseze chuma chachinene chakuzeneka kulinga, ali mulambu wakulihana wakuyoya cha Kalunga kuyoyela muli enu, chakulingika lyehi chize chakwoloka mwomwo chapwilenga chakwoloka. Kuya kaha kulutwe, kanda numba kushinganyeka chuma chamokomoko hali evi. Kuchiyoyela kaha. Kahajino tala, mwomo omwo chili nakulingika. Enu kaha. . .enu kamweshi. . .Enu muli mulikulakula jila. Omu mukiko Kavali yalumbunukila kuli enu, mulikula kula jila, vasokolwele lize likumbi.

¹¹³ Jino, jino anuka, ove kaweshi kupwa chimbwa pembe kaha chimbwa mukoko. Vakiko kaveshi kulifutulako.

¹¹⁴ Jino, kuli vathu vavavulu ngwavo, “Eyo, unatachikiza tahi? Etu tukwechi chikungulwilo mulizavu lyetu. Etu, etu tweji kukafwa vakakuhutwa. Etu tweji kulinganga *evi*.” Mukiko

vene, oloze uli na kuvumisa mbinga yove hali echi. Ove kanda kulinga echiko.

¹¹⁵ “Enu hanenu mawana enu mukusweka,” Yesu ngwenyi. Kupwa kaha chuma chakulinga lyehi, chumachimwe kuli enu, kuhambakana kuya, kumbata kunwa meya. Enu muli napwila. Kachi muthu wakushisaho ali napwila, ove mushinganyeke ikiye, nawa. Kaha kutonda cha muthu wakushisaho, mushinganyeke ikiye nge chambwanga kutonda chove. Kaha kuhaka mangana kuli echiko. Twalilaho na kuyoya.

Jino, ove kaweshi kuhasa kupwa chimbwa mukoko kaha chimbwa pembe.

¹¹⁶ Shikaho kachi ove muhanjika ngwove, “Chamwaza, liuka lyetu likwechi chivwasano. Etu tweji kuhananga vakakuhutwa, kaha etu tweji kulinga *echi*, kaha kulinga *chize*, kaha na kulinga *mukwavo*.”

¹¹⁷ Kachi enu namupwa naechi chakuzeneka kupwa nachikwavo, Kuyoya cha Kulishitu muli enu, enu muli kaha vene nakuchilinga mwamokomoko. Yesu. . . Paulu ngwenyi, Kolinde Watete 13, “Chipwetuthu Nanguhana vyuma vyami vyosena vyamwaza nakulisa vakakuhutwa, kaha kupwa na mujimba wami kuwocha kupwa mulambu, echi kacheshi kungukafwa yamiko.”

¹¹⁸ Jino, echi chili chachikalu, oloze echi chinapu Muchano. Enu mwatela kwiza kumuchano, kwanuka chuma Kavali yalingile kuli enu. Etu natutala hali echi, na kuhanjika, “Mamalelo, eyo, echi chili chamwaza.” Echi kacheshi ngochoko. Kachi uze Mwana Kalunga ayile ku Kavali, na kumusukika, kaha mwana wosena uze mweza atela kuya ku Kavali. Ikiye atela kupwa na Kavali. Enu mwatela kupwa na lize likumbi ku Kavali. Ngwatela kupwa na lize likumbi ku Kavali. Echi chikiko chakumishile chihula cha shili. Keshi kulimeneka na mukakunangula; keshi kulimeneka muliuka; keshi kwiza ha sonako; keshi kwiza ha kulinangula. Oloze kwiza nakwingila kuhichila mu Kusemuka. Ikiye kahanyine mukandako. Ikiye kahanyine kulinangulako. Ikiye ahanyine Kusemuka. Omu mukiko etu twatela kwiza na kwingila. Kahajino, kufuma haze, tuli vene vakuyoyela mukuyoya cha Vakakulishitu.

¹¹⁹ Jino, chuma chikwavo. Chimbwa pembe, chimbwa mukoko, vakiko kavatela kupwa nachuma kanako. Ove watela kupwa pembe mokomoko mukoko. Ove kaweshi chimbwa pembe kaha chimbwa mukoko. Ove watela kupwa pembe mokomoko mukoko.

¹²⁰ Jino, kachi ove uli kaha nakulinga vyuma vya mwaza, kaha kushinganyeka nge mukaya nakwingila, hali chize, kahajino kachi kakwapwile lize likumbi lya Kavali. Elu lushimbi lwanaha echi. Oloze, kupwa linambate lize likumbi lya Kavali, lyapwile nakuneha echi muno, nge etu katweshi kuhasa kupwa

kaha mamembala va liuka, oloze kupwa vana vamaunga na vamaupwevo va Kalunga. Echi chikiko lize likumbi lya Kavali lyapwile. Omu mukiko lyalumbunukila kuli enu, mangana muhase kulinga, na kukavangiza, kaha kulinga nge Yesu.

¹²¹ Jino, kalwiji keshi kuhasa kahako kuhita helu na hamavu, ha lwola lwolumwe. Kalwiji eji kuyanga kaha jila yimwe. Kaha na Shipilitu ya Kalunga yeji kuyanga jila yimwe. Kaya futula vyuma kala na Ikiye ko. Eji kuyanga jila yoyimwe kaha.

¹²² Tala Yesu, mukusoka. Yesu ngwenyi, “Eyi milimo Nguli nakulinga namukaya nakuyilinga nayenu nawa, kaha kuhambakana neyi enu namukavilinga, mwomwo Yami Nguli nakuya kuli Tata.”

¹²³ Kangweshi nakuhanjika echi chikuma kuliuka hanoko. Enu ivwushisenu. Oloze eyi Mijimbu yili hatepu. Masauzande teni yeji kwivulilanga, muka kaye kosena.

¹²⁴ Yami nanguya nakukumbulula chize chihula chili chakutoleka, hano jino. Ngunapunga kakavulu nakuhanjika. . . kwambulula. Vakiko ngwavo, “Mwomwoika, ove wafwelela Mbimbiliya? Yesu ngwenyi, ‘Eyi milimo Ngweji kuzatanga namukayilinga nenu nawa, kaha kuhambakana neyi enu namukayilinga, mwomwo Yami Nguli nakuya kuli Tata.’”

¹²⁵ Omwo chapihya kumbata echi, mukulwane? Omwo chili hahasuku na kutumbununa munahase kulikomokela, na kunangula cha kutanga, na kwivwushisa cha muwongo cha kala chuma? Ove sepa lyami walikoji kaha wakujimbala, kaweshi kuhasa kwivwushisa nge eyi Mbimbiliya vayilumbununa mushipilituko?

¹²⁶ Yesu asakwilile Ise nge Ikiye aswekele Echi kuli vakakutanga, na vakakuzangama, na vakamangana, na kunangakana, na kusolola Echi kuli va kemba vaze vanahase kwiza ku Kavali.

¹²⁷ Jino talisenu. Yesu ngwenyi. Tala omwo Ikiye achihanjikile. “Eyi milimo Nguli nakulinga,” Ikiye ali nakuyilinga hano vene. “Eyi milimo ize Nguli nakuzata hano, kuka vakakuviza, kusangula vafu, kutonesa meso atupuputa, eyi milimo namukayilinga nenu nawa. Namukaya nakulinga evi kachi enu mwangufwelela Yami. Enu namukazata eyi milimo. Kaha jino kuhambakana evi enu namukaya nakulinga, mwomwo Yami Nanguya kuli Tata.”

¹²⁸ “Kashimbu kakandende kaha, kaha kaye kakeshi Kungumonako chekako, oloze enu namuya na Kungumona. Nanguya nakupwa na enu, na muli enu, nakumakumishilo akaye. Kangweshi kumiseza chakuzeneka mukakumivendejekako. Nanguya nakumulomba Tata; Ikiye mwaya nakumitimina weka Mukakuvendejeka, ou ali Shipilitu Wajila, uze vakakeye kaveshi kuhasa kumutambulako; oloze, enu mwahase kumutambula Ikiye.”

129 Jino tachikizenu. Uze “wakuambakana” milimo, chapwilenga kupwa na Ngolo mu Liuka, keshi nge kuka kaha vakakuviza ha kulombelela, kutapula vandemone ha kulombelela, oloze kuhaka Kuyoya cha Hayamyaka kuli vakakufwelela. Uze Shipilitu Wajila apwile nakwiza, vanamuhane mumavoko ali Liuka, na kuhaka Kuyoya. Mamalelo! Echi chikiko yalumbunukila Kavali. Echi chalovokele, chashikumwishile malunga na mapwevo, kaha na kuvazezula muchihela, kupwa vana vamaunga na vamaupwa va Kalunga, mangana vokenga vakakuviza na kuhaka Kuyoya cha Hayamyaka; ha kuhana Shipilitu Wajila kuli vakakufwelela vakwononoka, malunga vaze vapwilenga lwola lumwe vakakuzeneka kufwelela, kuvalingisa kupwa vakakufwelela, kuvahaka vya shipilitu, Kuyoya cha Hayamyaka.

130 Omwo chahambakana kutohwa: Kuhanjika echi, “Ou pwevo wakuviza nasavala aha, Ngunahase kulomba na kulombelela cha lufwelelo kaha ikiye mwaya nakuhinduka,” echi chinapu chuma chachinene, omu mukiko Ikiye apwilenga nakulinga kuze; “oloze,” ngwenyi, “vyavinene kuhambakana evi namukaya nakuvilinga; nangukaya nakumihana Ngolo, keshi kaha ja kuhindula mukapyapa kakandende ko, oloze kumuhana ikiye Kuyoya cha Hayamyaka, uze naukapwa wa Hayamyaka, na myaka.”

131 Wakuhutwa, kapuputa, vathu vakumona lupi, evi navimihita ngachilihi? Kamweshi nakumona uze “unene” chuma kana? Echi chinapu chuma chachinene chinahase kusoloka, chapwile kuhaka Kuyoya cha Hayamyaka muli vathu. Kuyoya cha Hayamyaka chuma Muka? Chize Kuyoya chize Ikiye ayoyele, chize Kuyoya chize chapwilenga muli Ikiye, kuhaka Chize muveka nawa. Kutala muthu nahase kulinga echi? Mwana Kalunga nahase.

132 Yesu ngwenyi, “Wosena namujimbanganyina shili, kuli vakiko vanajijimbanganya; wosena namutulikila shili, kuli vakiko jili jakutulika.”

133 Jino hano hakiko liuka lya Katolika na veka vavavulu vaseukile. Vakiko veji kulovoka nakuya nakuhanjika ngwavo, “Nanguya nakukukonekela shili jove.” Omu mukiko chapwa.

134 Jishili mu Mbimbiliya vajikonekelele ngachilihi? Petulu akumbulwile chize chihula, ha Likumbi lya Pendekosita. Vakiko ngwavo, “Natulinga ngachilihi numba vatulwile? Natumbata etu ngachilihi Echi enu mukwechi?” Ikiye alile kwala chakusoneka. Ikiye avalwezele vakiko mwakulingila.

135 Ikiye ngwenyi, “Pihililenu nakwalumuka, muthu wosena muli enu, kutwala kuli Kalunga, kaha pwako wakujimika mu Lijina lya Yesu Kulishitu.” Cha chuma muka? Chize kujimangana shili jenu. Kuli chize “unene” milimo.

¹³⁶ Vangahi, enu vakakunangula chino chimene, vangahi, enu muli na kwivwulila ku Lizu lyami ha tepu, vali vakulizanga kuya ku Kavali chino chimene? Kaha tala chuma Kalunga akulingilile ove kuze. Kaha seza vilinga vya chikungulwilo, kaha nangula Mujimbu wamwaza. Haleluya! Echi chili mutungi yove jino. Naukaya nakulinga ika Nechi?

¹³⁷ “Mwomwo kupihilila nakwalumuka na kujimbangana jishili chatela kuchambulula mu Lijina Lyenyi, ku kaye kwosena, kuputukila ku Yelusalemu.” Haleluya! Upahu! Ove yove haze.

¹³⁸ Kavali yalumbunukila muka kuli ove? Chuma muka lize likumbi lyalingile? Kutala chafumishile majilo muli ove, na vyuma vimwe vya kulinangula vyauthu? Kutala echi chakulingishile kufumisa chikovelu? Mokomoko chakulingishile ove kupwa Mukakulishitu, kukulanjisa? Haleluya!

¹³⁹ Shili, yajimbanganyine! “Milimo yayinene kuhambakana evi namukaya nakulinga.” Enu mwamono hiya “ey’o” vali, keshi ngochoko? “Milimo yayinene kuhambakana evi,” kujimbangana jishili, mu Lijina Iya Yesu Kulishitu.

¹⁴⁰ Oloze kuhichila mujishimbi na vikungulwilo, na vyangocho, echi chili chakukukasa ove nakukuneha kuchihela, ove uchili lika nakuzachila kaye. Ngulweke yami kala muthu, ngulweke kala pwevo, nahase kwiza ku Kavali na kweseka nakupwa muthuumwe wamunene mwomwo muthuumwe kuhanjika chumachimwe. Ngulweke yami kuli ove unahase kutala kumeso a Kavali, mukumunyika chakwoloka, lize likumbi mu Kavali. Naupwa ove ngachilihi nalikumbi lyove ha Kavali, na kulovoka muchikovelu chamajilo? Ove mwiza ngachilihi nakulovoka kufuma mukupwa wawoma mwomwo ya chikungulwilo, na kunangula kunangula vyuma vya vathu? Mwomwoika echi kacheshi kukulingisa ove wakulikehesa ku Lizu Iya Kalunga? Kachi ove nauyako kuze, ove mwiza nakulovoka mukulikehesa. Ove muya nakutonda kupwa umwe wamunene wa chumachimwe muchikungulwilo chove, na lingona mulitepa lyove, omwo Yesu Kulishitu uze Mwana Kalunga alinyishile Lyavene kumujimba wakuuva, kumeso akufwijila, palanga sonyi na chasonyi? Kaha vakiko vamuzulile Ikiye uvwalo wosena, kaha vamusukikile Ikiye, kumeso akaye. “Kutoleka sonyi.” Nauya ngachilihi ku Kavali na kwiza na chuma chakuhandunuka kuhambakana omwo apwile Ikiye, chasonyi, sonyi?

“Mamalelo,” ove ngwove, “vakiko navaya nakungutapula yami.” Echa vakiko vangutampule.

¹⁴¹ Pwako na likumbi lyove ku Kavali, Kalunga mwaya na kupwa na jila Yenyi na yove. Echa nguhanjike echi cheka. Pwako nalikumbi lyove ku Kavali, Kalunga mwaya nakupwa na jila Yenyi na yove.

Echenu tulombe.

¹⁴² Mwata, Ove Kalunga, tumbate etu vosena naku Kavali jino. Echenu tumbatenu kufuma kulietu vavene, Mwata, woma wa vathu, woma wakala muthu mwaya nakuhanjika. Mwomwoika, kaye kosena kamusehele Ikiye, nakumuseha Ikiye. Oloze Ikiye apwile mukakwononoka, na kukufwa. Ikiye apwile wakwononoka, chasonyi. Ikiye apwile wakwononoka, numbathuhu mwishi ya fulumende yamwaka.

¹⁴³ Kaha etu tunanuka omwo Satana avetele hamavu, ikiye ejile nakupwa mukakuyula na lusesa hano hamavu. Ikiye apwile chinjiho youmwe kumeso a Mwata wetu, kaha ngwenyi, “Awa mawangana ami. Nanguya nakulinga nawo mwosena omwo Nangusaka.” Kaha etu tunanuka echi, kufuma lize likumbi kulinga echi, aka kaye, mwishi ya changu, vanaliyulu kuli umwe uze alyangwile.

Oloze, Kalunga, Ove Kalunga, etu tweji kuzachilanga Wangana uze wakuzeneka kupwa wakwangula.

¹⁴⁴ Tata Kalunga, omwo chawaha, echi Ove unalingi chuma chachinene mu—mu chifwanyisa wa kaye lelo. Kwecha evi vifwanyisa vyavinene, nge *Jishimbi Likumi*, kaha navyangocho, lovokenu, na kwecha malunga na mapwevo vamone, chize chahonene numba kwilavisa chikolo cha liuka, oloze echa vakiko vamone echi chuma muka. Kalunga jila jenyi vajihungile, ku kaye. Mwomwo etu tuli nge. . . Etu tweji kuyanga ku Russia kuhichila mu communism.

¹⁴⁵ Etu tuli muno mukaye, oloze etu katweshi va mukayeko. Etu twayile ku Kavali. Etu tuli nalisukika etu vavene, mwomwo ya Wangana wa Kalunga, kupwa umwe Wenyi. Numbathu kaye nakahanjika ika, etu tuli nakumbata jila yimwe na vase vavandende vakutoleka va Mwata. Etu tuli nakuya kukusanguka, kaha etu twafwelela chize chize chinapu hakamwihi na livoko, Mwata, palanga omwo etu natuya nakupwa vakusangukila Muwangana uze nauya nakumbata kano kaye. Nge Ndanyeke echi mwene, kaha chahokwele kaye kosena, mumajilo amandende, kaha peho yeji kuhuhwa ha chishika na chihela cha kuzungula. Oloze, pili, eli Lilolwa lyakulile nakupwa pili yayinene yafwikile kaye. Lize Lilolwa nalikeza. Ove Kalunga, etu twatondo kupwa chihanda cha echi. Echenu tulikanenu etu vavene, mbatenu kulusu jetu hakumbi hakumbi, muyoyele Kulishitu, yoyela veka. Tuhanecho echi, Mwata.

¹⁴⁶ Kuli vamwe kuno chimene chino, kaha vanazeneka kutachikiza Ikiye kupwa Mulwilo, kaha vanatondo kuvanuka mukulomba cha kusoka, kaha vanatondo echi kupwa lize likumbi lyavo ku Kavali, vanahase kukatula mavoko enu, nakuhanjika, “Ngulombelelenu, Ndumbu walunga Branham. Ngwatondo kumutachikiza Ikiye kupwa Mulwilo wami.”

Kalunga akukisule, mukweze walunga. Muthu weka? Kalunga akukisule, ndumbu walunga kunyima kuze.

¹⁴⁷ Kunahase kupwako mthuumwe? Kuhanjika, “Ngwatondo kumutachikiza Ikiye. Ngwatondo eli kupwa likumbi ha Kavali, lya yami. Nguli nakuviza kaha kuzeza. Mulimo uka yami chinaleme hano na chuma chosena chize Ngwasemukilile kulinga? Ngwasemukile, kusemuka kupwa mwana Kalunga, kaha hano Nguli nakukwachilila ku vyuma vya mukaye. Kalunga, echa vangusukike lelo. Echa vangusukike, lelo, amilyavene na vishinganyeka vyami, mangana Nguyoye na Kulishitu, kaha kuyoyela veka. Numbathuhu vakiko navalinga ika kuli yami, navangusekeleka yami, kaha kungujiha yami, kaha kuhanjika vyosena vyavipi hali yami, na vyuma kala, echa ngutambuke mukulikehasa nakuya, na kuvova, nge mwana mukoko, nge omu Ikiye alingile. Kaha kala likumbi, Ikiye ashikile kumukatula cheka, ha Likumbi lya makumishilo. Nguli nakutatatala lize Likumbi.” Kunahase kupwa mavoko akwavo navemika? Kalunga amikisule kunyima okwo, na ove nawa. Chosena chakwoloka. Vakwavo nawa...Kalunga amikisule. Kalunga amikisule. Vakwavo nawa, shimbu kanda tulombe.

¹⁴⁸ Ove Tata wa Mwilu, vachambile ngwavo, omwo Petulu anangwile ha Likumbi lya Pendekosita, “Vavavulu vafwelele vavahakilileko ku Liuka.” Vakiko mwamuchano vene vafwelele na michima yavo. Ava vathu vazundwile mavoko avo, Ngwafwelele nge vakiko vafwelelele na michima yavo. Kaha kachi vakiko vali, vijiva vyavo vya meya vili nakuvandamina hano. Vakiko vatondo jize jishili kujikonekela. Kuli muthu umwe hano vanahase kuvajimika mu Lijina, kaha Lijina kaha lize lili mwishi ya Mwilu vanahane muli vathu, mangana vavalwile nacho.

¹⁴⁹ Mwomwo, nge omu Ngwatanganga mu Chisoneka hakatando kakandende hanyima, chize, “Pihilila na kwalumuka na kujimangana shili vatela kuchinangula mu Lijina Lyenyi, ku kaye kosena, kuputukila mu Yelusalemu.” Kaha mu Yelusalemu, nge mu pihilila na kwalumuka na kujimbangana shili vayinangwile, uze kapositolo avalwezele vakiko mu Visoneka, kaha ngwenyi vakiko vatela “ku pihilila nakwalumuka, chatete, kaha jino vamijimike mu Lijina lya Yesu Kulishitu.” Uze wapwile mulimo wa mukakunangula kulinga chize. Mwomwo vakiko vatela ku pihilila na kwalumuka, kaha ikiye kuvajimika na kujimbangana shili javo. “Wosena ukwechi shili jenyi vanajimbangana, kuli vakiko vanaji jimbangana; wosena jishili vanatulikila, kuli vakiko vanavatulikilajo.”

¹⁵⁰ Tata, kaha kaye kayile kafumine ngachilihi mujila nakupwa naunyike wangana? Mwomwoika kufwelela Mujimbu wamwaza wawashi ngana? Kaha vakiko vanehelemo, na echi, chimbate chihela: majina a kwonga, lujimiko lwa kwonga, malujimiko a Shipilitu Wajila a kwonga, kulimeneka mumavoko na

vakakuzata, kuzachisa mitwe ya Tata, Mwana, Shipilitu Wajila, evi kavyeshi Muvisoneka ko; Mukanda wakutunga kuli malunga vamu Loma, keshi kunangula cha Vakakulishitu ko numba kumwe mu Mbimbiliya. Kujimbangana jishili kajeshi kujifumisa kuhichila mu mutwe, oloze kuhichila mu Lijina lya Yesu Kulishitu.

¹⁵¹ Jino, Tata, etu tunatachikiza echi chili chakuzeneka puho. Jijila jenu jinapunga lwola lwosena muli eyi jila. Oloze echa malunga na mapwevo, chimene chino, kwiza kuli echi lelo, lize likumbi ha Kavali. Kulihi, Yesu, kutoleka lize likumbi, ize sonyi, kumuzula, kumuvatula muvihanda vihanda, kumufwijila, nakumusekeleka; ku kaye kosena, ku liuka, kuli vathu vaze vatelele kumuzanga Ikiye. Kaha, oloze, muvosena vize, Ikiye kasokolwele mukanwa Kenyi ko, kaha ayile na kufwila vaze vathu vaze vapwile nakumusekeleka Ikiye.

¹⁵² Kalunga, tumbate etu ku Kavali chimene chino. Kaha kachi vakiko navahanjika ngwavo twazaluka, vakiko navahanjika ngwavo tunahengesa Visoneka, kala vyosena vakiko navatonda kuhanjika, Kalunga, vakiko kaveshi kuhasa kwimana Kumeso a Kalunga na kuhanjika nge echi chakuhenga.

Vakiko kaveshi kuhasa kufwika jishili javo na Mbimbiliya ko. Eyi Mbimbiliya jeji kufukununa jishili javo: kuzeneka kufwelela chavo; kupwa vapuho; kulinga nge vosena vakalikungumbuwa. Echa vakiko vezenga ku Kavali chino chimene.

¹⁵³ “Kaha kuputukila ku Yelusalema; nge kupihilila na kujimbangana jishili jatela kujinangula mu Lijina Lyenyi ku mafuchi osena, kuputukila mu Yelusalema.”

Echa vakiko vambate chize kusukika chochimwe natambo yakuvatula; na kumifwijila; na kumisekeleka; kaha kusanyika vyuma vyosena vize vakiko vanahase kusanyika kuvihaka mumukana na vakakufumbukila kulifukula; kupulapula mauka; vyosena vakiko vanatondo kusanyika.

Echa etu, Mwata, chimene chino, mbatenu jijila jetu navaze vavandende va Mwata. Echa etu tutambuke nge omu alingile kapositolo, numba kwalumukila kuchilyo mokomoko kuchimoswe, kaha kufuma kukuwaha cha michima yetu kuzachila Kalunga. Tuhanecho echi, Tata.

¹⁵⁴ Jino, kuhindula vakakuviza na vakakuyanda vali nakwiza mumukana wakulombelela. Echa ava vanazundula mavoko avo, mukachi kamichima yavo, kupihilila nakwalumuka, hano jino. Echa vaze vanemana kunyima chikuma, washiwashi vatambuke vayenga kumeya na kutambula kufumisa jishili javo ha Lijina lya Mulambu, Yesu Kulishitu, ikiye Mwana Kalunga. Amena.

Ku kulusu kuze Mulwilo wami afwile,
 Kuze kukosa chakufuma ku shili kuze
 Ngwatambakanyine;
 Kuze muchima wami vaukwichile na
 Manyinga;
 Upahu kuli Ikiye. . .

Upahu ku Lijina Lyenyi!
 Mamalelo, upahu ku Lijina Lyenyi!
 Mamalelo, kuze muchima wami vaukwichile
 Manyinga;
 Upahu ku Lijina Lyenyi!

Yami nguli wakuwahilila hakungulwila
 kufuma kushili, (Mujila muka?)
 Yesu twama mukachikami,
 Kuze ku kulusu kuze Ikiye. . . (Pwako umwe
 Wenyi.) mu;
 Mamalelo, upahu ku Lijina Lyenyi!

Upahu ku Lijina Lyenyi!
 Upahu ku Lijina Lyenyi! (Lijina Lyamwaza.)
 Mamalelo, kuze. . .muchima vaukwichile
 Manyinga;
 Upahu kuli Ikiye. . .

¹⁵⁵ Echi kachalingile chuma chimwe kuli oveko? Chakunehelile kapwele. Nakuhaka lutalililo muli ove: Kuyoya, Kuyoya cha Hayamyaka.

¹⁵⁶ Chuma muka echi “vasukikile na Kulishitu hamwe”? Chili kuyoyela veka. Veka muka? Vaze vakuujinda, vaze kavakuzangako, vaze veji kukusekelekanga: vayoyele vakiko; pwako navo vakiko; vazange; “valombele vaze vali nakukuzachisa ove, kuhanjika vyavipi vyakwonga vyosena, mwomwo ya Lijina Lyami. Vakiko vajihile tupolofweto valivangile kulutwe lwove.”

¹⁵⁷ Ngwashinganyeka ou mujimbu nauya nakukafwa liuka chino chimene, ngana nge namuya nakumona nge etu twatondo Kavali, etu twatondo kusukika.

¹⁵⁸ Jino chalingika ngachilihi? Echi chili chakufweta lyehi. Ndumbu wapwevo muchitwamo chakwenda, kuli vathu hano vali nakuviza na kuyanda: Echi chili chakufweta lyehi; chuma chimwe kaha mwatela kulinga shina kufwelela nge echi chinapu chenu; chitavile mujila yoyimwe, kaha nauya nakuhinduka.

¹⁵⁹ Anuka: Jino chuma muka echi? Enu munahase kuya ku kaye, kunangula Mujimbu wamwaza, kuhindula vakakuviza; na kuhaka Kuyoya cha Hayamyaka.

Nachipwa chachinene ngachilihi: cha, hano hali lunga nasavala aha na—na lihute, kansa, kala chuma kana. (Etu twamumono Ikiye lwola lwaluvulu kuhaka kukisula Chenyi na

kuka ou lunga, kuka ou pwevo; masauzande likumi mukuvula mazauzande maukalu akuzeneka kulumbunuuna mukaye kosena, talenu, kuvafumisa mumihela, na vipoya; muvwimbimbi kaha wa vathu kupwa wakulya ku kansa; lelo, alikanawa, vathu vakulikangula.) “Eyi milimo Nguli nakulinga namukaya nakuyilinga nawa; oloze kuhambakana nenyi namukaya nakulinga”: “kuhambakana nenyi,” echi chakwoloka.

Chuma muka? Ngwavahanyine vakiko kutwalilaho chiyoyelo, kuhichila mu Lijina Iya Yesu, kutwalilaho chiyoyelo cha makumbi amandende.

Oloze, “Kuhambakana nevi enu namukaya nakuvilinga: namuyakaya na kuvahana vakiko Kuyoya Hayamyaka kuhichila mu Lijina Lyami.” Ohoo!

¹⁶⁰ Mwomwoika ika ove uli nakwivwa sonyi na lize Lijina Iyamwaza? Mwomwoika vathu navakana eli na kutalisa nyima kuli eli? Echi chinapu ndemone. Punduvene.

¹⁶¹ “Kupihilila nakwalumuka na kujimbangana shili vatela kuchambulula mu Lijina Lyenyi ku kaye kosena, kuputukila ku Yelusalema.” Kuze kukiko kuli Mujimbu wayile chakulivanga. Echi chakwoloka? “Kupihilila na kwalumuka na kujimbangana shili navakajinagula mu Lijina Lyenyi, kuputukila mu Yelusalema.”

¹⁶² Jino, chakulivanga, natuya nakulinga echi nge omu Ikiye alingile: kupwa nakulombelela na kuka vakakuviza.

¹⁶³ Chashishiho, natuya na kupwa na wana waunene: Meya ali akulizanga Iyehi, kunyima kuno, kuli kala natondo kupwa wakujimika (kuli vyakuvwala kuno vya mapwevo, vyakuvwala kuno vya malunga), vanemanyina enu mangana kufumisa shili; mwomwo anuka, nge munahase kaha kupwa na jishili jove kufuma kutesekesa na kunangula cha Mbimbiliya. “Mwomwo kakweshi Lijina likwavoko mwishi ya Mwilu vanahane kuli vathu, lize ove unahase kukulwila nalyo.”

¹⁶⁴ Paulu alihumanganyine navamwe vakujimika Iyehi. Kaha vakiko vapwile nakutambakana, vapwile na kuhasa. Ikiye ngwenyi, “Enu vamijikile mulujimiko muka?”

Vakiko ngwavo, “Lwa Yowano.”

Ikiye ngwenyi, “Yowano ajimikile cha kuneha kupihilila na kwalumuka.” Jino, mbatenu echi: lwa kwalumuka na kupihilila, keshi lwakujimbangana shiliko. Vangahi vevwushisa echi? Keshi lwa kujimbangana shiliko. Vakiko vavajimikile vosena mwakwoloka, mu kupihilila na kwalumuka. Vakiko vapihililile nakwalumuka: “Eyo, mwane, Ngunapihilila nakwalumuka. Yami, kufwelela Ikiye ali nakwiza.” Vakiko vapwile vakujimika va *kupihilila nakwalumuka*; muwihhi kuhanjika, “kufwelela hali Mwata Yesu Kulishitu.”

165 Kahajino omwo vakiko vevwile *chize* (nge Mulambu uneza lyehi), vakiko vava jimikile cheka, mu Lijina lya Yesu Kulishitu. Kaha jino, vachihakile muli vakiko, omwo ikiye ahakile mavoko enyi hali vakiko, uze Shipilitu Wajila; kaha vakiko vahanjikile mumalimi na kupolofweta.

166 Jino, omwo muya nakwalumuna chize Chisoneka ngachilihi? Ove haka munwe wove ha chihela chimwe mu Mbimbiliya kuze kala muthu vamukonekelele jishili javo, mu Tesitamende Yayihya, kaha kuze vajimikilenga keshi mujila yekako shina mu Lijina lya Yesu Kulishitu.

167 Ngulwekenu chihela chimwe mu Mbimbiliya muze kala muthu vajimikile lyehi mu Lijina lya Tata, Mwana, Shipilitu Wajila. Mokomoko kuneha kumesa yami yakusonekela mujimbu, mujimbu wa liuka uze nausolola kala muthu vajimikile lyehi mu Lijina lya Tata, Mwana, na Shipilitu Wajila, palanga mu myaka seli handulendi na vyimwe hanyima ya kufwa cha kapositolo wamakumishilo, omwo liuka lya Katolika lya livwasanyine.

168 Jino, Ngukwechi va *Pre-Nicene Fathers*, kaha va . . . vosena vakamijimbu, na vyuma vyosena, vali mukulinangula: vaze vakushikulu, mujimbu wakujila muno mukaye; kwinjikiza kaha chakulimanyina etu tuli nacho.

169 Kutanga *Our Sunday Visitor*, mokomoko ize catechism ka liuka lya Katolika, kaha vatale vakiko, vyuma muka vakiko navahanjika: “Vamwe vaze vakakulikanga ku katolika vanahase kuvalwila, mwomwo vakiko veji kunongamanga ku kunagula cha Katolika: Mwomwo ji Mbimbiliya javo ngwavo, ‘veji kujimika mu Lijina lya Yesu Kulishitu,’ oloze etu tufumise kalemesa hali ‘Lijina lya Yesu,’ na kulihaka hali ‘Tata, Mwana, Shipilitu Wajila,’ kaha vakiko navetavila.”

Jino, ngulwekenu Chisoneka chili chakulimbalaka nachize.

170 Kaha yenu vaze haze. Kaha, kaye hinakanongama kuli chize. Mwomwoika? Vakiko kanda lyehi vapwenga ku Kavali. Echi chakwoloka. Vakiko kanda lyehi vamone.

171 Vakiko veji kumisekeleka na kumivuluka enu . . . vakiko navaya nakumivuluka enu, “Vakakulyalanga vakujila,” “Yesu kaha,” kaha na majina osena akutoleka aze vakiko vahashile. Kaha chihandwa muka chinanehe nakuvuluka chavo hali enu? Vakiko valingile ika . . . Ikiye eji kuzakamina mwosena omwo navamuvuluka Ikiye? Ikiye va musukikile. Ikiye amuyoyelele Kalunga, kaha Kalunga kaha. Kaha kachi ize Shipilitu, yapwile muli Ikiye, ili muli ove, nayikulingisa kulinga chuma chochimwe: kumbata Lijina Lyenyi. “Kala chuma enu namulinga” (muyahanjika Mbimbiliya) “mu lizu mokomoko muvilanga, vilingenu vyosena mu Lijina lya Yesu, kuhana kwalisa kuli Kalunga.”

172 Kuli mwawanyine uze utatu, kunangula cha vakamakombelo? Kulovoka cha catechism, keshi chakufuma

mu Mbimbiliya ko. Lize lizu lya “tulunga vatatu” kavalivuluka numba mu Chisoneka numba chimwe ko kufumisa mu Kuputuka swi naku Kusoloka. Kakweshi chuma changochoko. Kakweshi chuma changochoko ngwavo kalunga wamutatu. Ikiye apwa Kalunga, Kalunga kaha, Kalunga Umwe. Napunga lwola lwosena Kalunga umwe. Ikiye azacila mujiufwishi jitatu: Ikiye azachile lwola lumwe nge Tata, muli Mose. Ikiye azachile lwola lumwe mumujimba, nge Mwana, Yesu. Ikiye ali nakuzachila jino nge Shipilitu Wajila. Oloze ali Kalunga Umwe. Kalunga Umwe, keshi na majina atatu ko. Jiufwishi jitatu, mitwe yitatu mu Lijina limwe: Yesu Kulishitu.

¹⁷³ Kalachuma chakulimbalaka chinapu makombelo; kaha Ngwahulile muthu umwe kungulweka chize, kachi kacheshi ngochoko. Chize chakwoloka. Ngunahanjikanga echi myaka kufuma hamyaka hanyima ya myaka, kaha naumwe pimbi ambachilenga chize, oloze (Talenu?), mwomwo echi kacheshi kuhasako. Ngukwechi. . . Mbimbiliya eyi hano, chakulivanga; kaha kuli mijimbu yakushikulu ya kwinjikiza echi nge chili vene chakwoloka. Kaha mwomwoika uze ndemone kulinga. . . ? Nguli. . . Chamwaza, eyi Mbimbiliya ngwayo nakukapwa jila: “Vakiko naveza ngachilihi, kuvangila vakiko Nanguvakoka?” Omu mukiko kaha Ngunatachikiza echi. Omu mukiko Yesu ahanjikile, shikaho. . .

¹⁷⁴ Kangweshi nakuhanjika echi kupwa. . . Kachi Ngunahanjika chize, kaha kunangula mujimbu nge ou, Nangupwa mukakulyonga wakukuminamo hali enu. Chize chakwoloka. Ngunahanjika echi mwomwo Echi chinapu Muchano kaha Echi chinapu Kuyoya. Kuli vavavulu va kujimika muli Kulishitu, namuvwale Kulishitu. Vakiko vali na Kuyoya, ha Lijina Lyenyi.

¹⁷⁵ Etu twalombo mu Lijina Lyenyi, tonda Lijina Lyenyi, kunangula mu Lijina Lyenyi, kujimika mu Lijina Lyenyi, kuyoya mu Lijina Lyenyi, kufwa mu Lijina Lyenyi, kuya Mwilu mu Lijina Lyenyi, Kusanguka mu Lijina Lyenyi. “Jitanga Yosena ja Mwilu vajivuluka hali Yesu.” Eyi Mbimbiliya yahanjika ngocho: “Jitanga josena hano hamavu vajivuluka muli Yesu.” Ikiye ngwenyi, “Ngwejile Mwami. . .”

Enu namuhanjika, “Chamwaza, lili Lijina lya Tata.”

Tata keshi lijina, ili mutwe. Ikiye ngwenyi, “Yami Ngwejile mu Lijina lya Tata, kaha enu Kamwangutambwileko.” Jino, Ikiye ejile mu Lijina muka? Huu-huu. Punduvene, “. . . kaha enu Kamwangutambwileko.”

¹⁷⁶ Shikaho yenu vaze haze; echi chili kaha, yaah, echi chili chakusweka kumeso avakamangana. Pundu, chili pundu, huu-huu.

¹⁷⁷ Kaha mu Kusoloka, nge omu twanangulanga likumbi likwavo: kuli liuka lihule wamwaka, eli lyapwile chakulivanga

kulivwasana; kaha jino ikiye apwile na lizavu lya vana vamapwevo vase semukile kufuma muli ikiye. Vakiko veji kulinga chuma chochimwe, tato yoyimwe. Ikiye ejile nakupwa Mbabilone, jila yoyimwe, na...na liuka lya mu Loma kaha kuliwana cha mauka cha—cha mafuchi; kaha ikiye uze, chosena kwiza nakupwa, chosena muchuma chimwe, wato umwe.

¹⁷⁸ Oloze Liuka lya Kalunga (Haleluya!), eli lili Liuka lya kusanyika, lya kuhandunuka. Kaha Liuka vanalitungu ngachilihi? Nawijiva ngachilihi echi? Kaha ove mukatachikiza echi ngachilihi Muchano? Nge Kalunga mwachisolola kuli ove. Chapwile ngachilihi—chapwile ngachilihi na Avele kutachikiza nge apwile mwana mukoko keshi apo ko? Echi vanasolola kuli ikiye: “Ha lufwelela Avele ahanyine kuli Kalunga mulambu wamwenemwene.”

¹⁷⁹ Kwiza nakufuma kufuma Kupili ya Kwalumuka, Yesu ngwenyi, “Hiya vathu vanambe yami Nguhiya?”

Vamwe ngwavo, “Eliya,” “Mose,” kaha na vyangocho.

Ikiye ngwenyi, “Oloze Nguli nakumihula enu, ‘Enu ngwenu yami Nguhiya?’”

Petulu ngwenyi, “Ove yove Kulishitu, Mwana Kalunga wakuyoya.”

¹⁸⁰ Ikiye ngwenyi, “Enu kamwalinangwile ngochoko...” Mujila ikwavo (Nanguhanjika omu, keshi kupwa wamunene, oloze kwiza hamutwe uvene): “Enu kamwalinangwile echi ku shikola yimweko; keshi muthu umwe akunangwile ngochoko; oloze Tata Yami, ali Mwilu, akusolwela echi kuli ove: nge YAMI (keshi Tata, Mwana, na Shipilitu Wajila, oloze, Yami Yesu Kulishitu). Kaha hali eli lilolwa (Lilolwa muka? Youmwe Avele ayile; hali lize lilolwa lyolimwe.), hali eli lilolwa, lize kusoloka cha Muchano cha Kalunga, Nanguya na kutunga Liuka Lyami, kaha vikolo vya hetese kavyeshi kuhasako.” Echi chakwoloka. Vakiko nava kesekanga, oloze vakiko kaveshi kukahasako. Talenu?

¹⁸¹ Shikaho yenunga kaha ku Kavali, pwenu vakusukika, kindulukenu, kaha mbatenu jila yenu na vase vavandende vakutoleka va Mwata, nakuya.

¹⁸² Jino, Mwata, etu tulinakukujika vyuma vyosena kuli enu. Ngunahaono kutachikiza, kufuma muno mulizavu, chuma muka chili muno. Kangweshi na chishinganyeka cha kutachikiza, Mwata, kuvangila Ove muya nakuchisolola. Kaha jino, Tata Kalunga, Kangweshi na kukulomba Ove kulinga echi ko. Ngunachihake kaha echi hajitungi ja vathu. Yenu vase haze. Echa echi chipwenga Kavali vene chimene chino; echa echi chipwenga kusukika chivene kukufwila chetu, na kufwila chetu chivene, na kuvyuma vyavinene vya kukuyoya.

183 Echa malunga vezenga nakupwa vakulinyisa, kaha vakulizanga kumbata jila yimwe na vase vavandende vakutoleka va Mwata. Echa vakiko vatambuke mwakulinyisa. Echa vakiko vapwenga vakusemukila muli ou Wangana, ou Wangana waunene wa Kalunga, ou unapu mujimba wamushipilitu, mujimba wamwilu wa Kulishitu hano ha mavu: “Ha Shipilitu yimwe etu vanatujimikila mu mujimba umwe.”

184 Tuhanecho echi, Mwata. Chipwethuhu vakiko vapwenga valava, vatoama, vausungwa, vachiluluka, kala mwosena vakiko vapwa, malunga mokomoko mapwevo, ndungo mokomoko mwanakachisemi: etu vosena vanatulingisa kunwa mu Shipilitu yoyimwe.

185 Tuhanecho echi, Tata, kaha echa echi chipwenga na... hali vavavulu, chimene echi, nge vakiko navaya nakwivushisa; echa Ove usokolole kwivwushisa chetu. Kahajino, echi nachiya nakupwa nge likumbi lyalihya kuli vakiko: musana naumwinyika, kaha fuvalali ya musana wakufuma mukutunga cha kunangula vathu nauchina nakuya, kaha Kumunyika cha Kalunga nachiya nakumunyikila mujila yavo, kaha kupula lihina lize lyeji kufwikanga Kumunyika chamwaza. Kaha vakiko vanahase kutambuka muli kulakula jila yajujila, kahajino, kuyoyela vakwavo, nge omu alingile Kulishitu.

186 Jino shimbu tuli nakuneha mukana wakulombelela, Ngwalombo nge Ove uyenga na kuwavisa vangamba Jove chimene chino, etu vosena, nge omu etu tuli nakulomba, hali umwe na mukwavo. Kaha tuhanecho, lelo, nge wosena muthu ali nakuviza uze ali nakwiza nakuhita mumukana wa kulombelela apwenga wakukiwa. Echa vakiko vakinduluke, nge uze kanyike wapwevo wameso akuhenga, kaha ou kanyike walunga, kaha ou... kaha uze pwevo wakalemesa wamukulwane, kaha—kaha Ndumbu walunga Wright, kaha navaze vavavulu muli vase vejile, Mwata, na kuyanda na misongo na vyuma vimwe vize mandotolo kaveshi kuhasa kukako; kaha vali hano lelo (mulungu kaha hanyima aha), kaha vali hano, eyo, lelo.

187 Kalunga, echa malunga na mapwevo vahite na lufwelelo lwolumwe, kutachikiza nge vakiko vali nakuya ku Kavali na kupwa vakusukika vishinganyeka vyavo na kujina chavo nge vakiko vana “pulasana lyehi kuhinduka.” Echa ngolo jize jamusangwile Yesu kufuma muchimbumbembe jivahane kuyoya, kuyoya chachinene cha lufwelelo.

188 Kaha jino, washiwashi kufuma echi, echa vavavulu vezenga kuchijiva cha kujimikila. Etu twalombo, mu Lijina lya Yesu. Amena.

189 Jino, etu tukwechi kaha na minyutu twende ya kuhita mumukana wakulombelela na kutanga cha lujimiko. Jino etu katweshi na makati akulombelelako. Etu tunafumisa echi muli chize, kaha etu natuya na kuzata echi mukuliwana

chachinene omwo natukaputuka. Ngunamilweke enu vyosena, etu tunavyale, etu tunavihake ha tepu, kaha kwosena okwo Nanguya, eji jitepu najilivangaho lyehi kulutwe.

¹⁹⁰ Chize chinjikizo chili nakwinyika kukukisula. Chishinganyeka chapwile, “Kachi ove muya nakulombela mukakuviza, nakulingisa vathu kukufwelela ove.”

Ngwambile ngwami, “Vakiko kaveshi kangufwelelako.”

Ikiye ngwenyi, “Ove navakuhana evi vinjikizo, kaha hali echi vakiko navaya na kufwelela.” Kaha evi vinjikizo vinatambuka lika na lika, ha myaka likumi kujinguluka kaye, chakuzeneka numba lwola lumwe kuhona. Numba kuhona chauchi, mwosena, muli echi. Vangahi vanatachikiza echi kupwa muchano?

¹⁹¹ Chamwaza, kachi ove mufwelela echi chinjikizo, kahajino fwelela nawa na Mujimbu. Echa chakwoloka. Echi chinasolola echi. Kaha Kalunga ahake muli yami Mujimbu (Kaha echa echi chipwenga chakukupuka nge ngachize, oloze chuma muka. . .) kaha Nangumilweka chumachimwe nge chamakuli? Kalunga kanda ungwechela yami ngulinge ngochoko. Nduma, nduma. Nduma, mwane. Nguli nakumilweka enu Muchano.

¹⁹² Jino, enu vosena muli nakutonda kumilebelela, nge ngocho, muli ou mukana jino, twayenu kusali eyi, kachi nge namuhasa, enu kuze, linungilenu mumukana kuchilyo. Kaha jino echi nachilingisa vathu kwiza shimbu etu tuli nakulomba. kahajino etu natuya nakumbata vaze—vaze vanyike vamaunga, vaze vakukulama kuvikolo kaha vakiko navapwa nakulama; kaha shimbu vakiko naveza nakuhita kuno, kajino enu kusali ikwavo, etu natuya nakuvaneha vakiko kuyima, kaha kuvaneha nakuhita omu. Kalamuthu wakulombelela.

¹⁹³ [Muthuumwe kuhanjika na Ndumbu walunga Branham—Muka.] Mamalelo, nduma, jino, Kangwalinganga ngochoko. Chamwaza, kalalwola ove unatondo. Kanda kulizakaminako. Ove unahase kumuneha, mokomoko ove. . . Ngunahase. . . kumuneha kuno jino, mokomoko chindende hanyima yachize, kala lwola ikiye natondo, kanda kulizakaminako.

¹⁹⁴ Jino, echa tupwenga vakuhola nge omu tunashiwila, muli enyi minyutu yayandende ilinakwiza. Ngwatondo enu vosena kupwa nakushinganyeka jino: Jino, chuma muka eyi—chuma muka eyi Mbimbiliya yahanjika? “Kulomba chakufwelela nachiya nakulwila uze naviji.” Vangahi vatachikiza nge echi chakwoloka? Vangahi vatachikiza nge Mbimbiliya yahanjika ngachize, “Evi vinjikizo navikakavanga vaze vakakufwelela. Eyi milimo Nguli nakulinga navakalinga navakiko nawa?” Kaha yapwile milimo muka? Ikiye ngwenyi, “Ngunahase nge enu na mufwelela nge Ngunahase kuli evi.” Echi chakwoloka?

Chihula chami chapwanga chika? “Vakiko kaveshi kungwitavilako.”

Ikiye ngwenyi, “Evi vinjikizo navikavalingisa vakiko kufwelela.”

¹⁹⁵ Jino, kachi enu mwafwelela, pwenu vakulizanga: Elu lunapu lwola lwa kusokoka. Chochimwe nge omu chapwa kufuma mushili, elu lunapu lushiko lwolumwe lwa Kalunga umwe.

¹⁹⁶ Jino, etu tukwechi wamundende, pwevo wakuviza hano, ali na ukalu wamujimo, wakufuma ku New Albany. Etu tuli nakuya nakumulombelela ikiye, chakavanga, shikaho ambate—ambate chitwamo chenyi. Jino, muholela, kaha kalamuthu, jino. Ngwatondo vandumbwami kungukafwa, hano. Kaha echa tunongamenu mitwe yetu chindende, jino, tulombe.

¹⁹⁷ Jino, Tata wa Mwilu, eli linapunga Lizu Lyove. Kangweshi wakwimanyinako ha chilinga nachiya nakulingika hali echiko, oloze Nguli wakwimanyinako kunangula echi. Kaha kutachikiza echi (na kutachikiza nge Nguli vupu ya lunga jino, kaha likumbi limwe nangukemana meso na mseo na Ove): Ngunanangulanga Muchano kufuma mumuchima wami. Ove unatachikiza echi. Keshi kupwa wakulisambisako, kachi chapwile ngocho, Mwata, kahajino Ngwatondo kupihilila na kwalumuka.

¹⁹⁸ Kaha Tata, Ngwalombo nge Ove unyenga nakukafwa, jino, shimbu natuya nakulombelela vakakuviza, echa kulombelela chami vachikumbulule, keshi kulombelela chami kahako, Mwata, oloze kulombelela cha eli liuka, shimbu ava vathu vakuhutwa. . . Kachi chinapu ngachilihi nge apwanga puwami hano? Kachi chinapu ngachilihi nge apwanga ikiye, kutwama mukalikoki? Mokomoko ndumbwami wapwevo? Mama Yami? Mamalelo, Kalunga, hindulula ava vathu. Nauya nakuchilinga, Mwata?

¹⁹⁹ Tala, kwimana mumukana wakulombelela: ukalu wamuchima, kansa, lihute, kala miyachi yamisongo na maukalu. Vavavulu muli vakiko vali nakwiza (mahandulendi vali nakuvalwila, hano vene, Mwata), kaha vakiko vali nakumona echi, kaha vakiko vanafwelela echi, kaha vakiko vali nakwiza mumukana wakulombelela nakwitavila vyavo. Vakiko vali nakwiza ku Lilolwa lyalimonyi jino, keshi ngamba Yove ko, oloze kuli Mwa Nove, Yesu, Ou ali Twamina ya Liuka, wamushipilitu, muuthu mukachi ketu. Kaha nge etu natuya, nakuhana Lijina Lyenyi (Ove ngwove, “Mu Lijina Lyami vakiko navakatapula vandemone.”), Ngwalombo nge Ove muya nakukumbulula malombo, mu Lijina Iya Yesu. Amena.

²⁰⁰ Jino, muthu wosena apwenga mumalombo. Jino, echi chinapu chihanda chove, nawa. Echi chinapu kulomba chove.

Jino ou pwevo wamundende atela kufwa, kachi Nachuma chimwe kacheshi kumukafwako.

²⁰¹ Vangahi vatachikiza Ndumbu walunga Stadsklev? Ndumbu walunga na Ndumbu wapwevo Stadsklev? Vangusanyikile kufuma ku Germany kapapa katatu muufuku ukwavo; kema

yavo nafu. Vakiko vahulile, “Ndumbu walunga Branham, etu twakumono ove, ha Shipilitu ya Kalunga, kusangula uze wakufwa,” (Vakiko vemanyine na kutala. Talenu?) “kaha etu tunatachikiza nge ove u kapolofweto wa Mwata. Hanjika kaha Lizu.”

Ngwambile ngwami, “Kangweshi nakuhanjika echi, kuvangila echi vanachihake mukanwa kami.”

“Twaya ku Germany.” Ngwayile washi washi. Kaha vakiko vatumine shinga: “Vambachile ndeke ize nayikuneha ku Germany mu jiola sikisi.” Ndeke ya maswalale nayingutwala ku Germany kuya nakusangula kemba. Ndeke ya maswalale nayiya nakungutwala mu jiola sikisi, kufuma ku Louisville na ku Munchen, Germany.

²⁰² Ngwayile kuze, kaha ngwafukamine hamambuli, kaha Ngwambile ngwami, “Tata, Ngwatela kuhanjika ika? Hanjika mukanwa kami.” Ikiye kangukumbulwileko. Ngwayile muchipapa, Ngwambile ngwami, “Tata, Ngwatela kulinga ika? Haka mazu mukanwa kami. Nanguya mwamokomoko, nge keshi ngochoko.” Ngwahilukile, Ikiye kangukumbulwileko. Twaya nakwingila. Chipwe nge ufuku Ngwalombele, “Mwata, haka mazu mukanwa kami.” Nachuma chimwe akumbulwile chauchi.

²⁰³ Chimene chashishileho pwevo lyami apwile nacho. Haze vene omwo ikiye ayile, lize Lizu (Ngwemanyine), Ikiye ngwenyi, “Kanda kutenukila echi ko. Eli linapu livoko lya Mwata.” Hu-huu.

Kahajino washi washi ku shinga: “Kangweshi kuhasa kwizako. Nduma, eli linapu livoko lya Mwata. Navangukanyisa.” Enu mwamono ngolo muka jili muze mukutenuka? Omwo Kalunga ahanjikile, “Kanda kulinga ngachizeko, mwomwo linapu livoko lya Mwata.”

²⁰⁴ Jino, Mose, lwola lumwe, vamulwekele kulinga chumachimwe, ayile na kulinga echi mukala jila. Enu anukenu? Shikaho Kangwa—Kangwayileko.

²⁰⁵ Kaha Kangwanehele kuli enu hajikiso nakumilweka vathu vawana vakuhandunuka, ize, wakuvuluka nge wakufwa kuli mandotolo, hanyima ya kulombelela na kutenukila kufwa. Talenu? Etu tunemana muze na kutenukila chize chuma. Kaha kachi Kalunga akuhanyine ngolo jakulinga chumachimwe, enu mwatela kupwa vakuvanguluka navyuma muli nakulinga. Talenu? Enu mwatela kupwa vakuva-...Ikiye ngwenyi, “Kanda...”

²⁰⁶ Jino, anuka, echi kachatela kusonekesa chikuma muli enu, oloze kuli yami, echi chalumbunuka chuma chimwe. Talenu?

“Kanda kutenukila echi ko.” Chiyema vene, muyachi wa Lizu (pamo sikisi seti, Ngwafwelela echi kupwa, sikisi seti ya

chize chimene) ngwenyi, “Kanda kutenukila echi. Eli likiko livoko lya Mwata.”

Ngwambile ngwami, “Ngwasakwila, Tata. Ngwasakwila, Mwata. Kangweshi kuya na kuchilingako.”

²⁰⁷ Kachi Ikiye ahanjikile, “Tenukila echi. Ou napu mukakole nalivembelamo.”

Nanguya nakuhanjika, “Echa tuyenga.” Kaha echi kachi chinalingika.

²⁰⁸ Omwo uze kanyike walunga wamuze mu Finland apwile nasavala haze, wakufwa, wakuchikika, keshi numba na chifuwa mumujimba wenyi, Mwata ngwenyi lize lyapwanga livoko lya Satana, ngwenyi, “Litenukile.”

²⁰⁹ Kaha Ngwambile ngwami, “Kufwa, ove kaweshi kuhasa kumukwata ikiyeko. Mukindulwise, echa apwenga wakukasunuka.” Muze, ikiye atumbukile namahinji eyi, chamwaza, keshi numba navifuwa vyakuhokoka mujimba wenyi. Lize likiko Lizu lya Mwata. Kangweshi kuzachisa Lizu lya Mwata palanga na Lizu lya Mwata naliza kuli yami.

²¹⁰ Oloze mu Chisoneka, Lizu lya Mwata linanguhane yami mulimo wakulombelela vathu vakuviza; kukuhana ove mulimo wakulombelela vakiko. Jino, “Kulomba cha kufwelela nachilwila uze naviji;” Echa tulombenu, enu nongamenu mitwe yenu; natuya nakumona chuma muka Ikiye ahanjikile, shimbu namuya nakuhitamo.

²¹¹ Enu Vakakulishitu, enu muli? Enu munafwelela na muchimwa yenu yosena nge Yesu mwaya nakumilingisa enu kanawa? Ukwechi ukalu waundende mujimo; unayande nawo myaka yayivulu, ndumbu wapwevo. Jino, enu namuya nakupwa kanawa, kachi enu namuya nakufwelela.

²¹² Jino, Mwata Kalunga, ou mukweze wapwevo atela kufwa kuvangila Ove umukafwe. Jino Ngwalombo, nge omu Nangutala hali ikiye, Kangweshi nakumona mulonga atela ikiye kufwako.

Kaha Ngulinakwivwa mushipilitu yami, Mwata, nge chili kwitavisa chakuya mu punga Yove, jino, kaha Ngunatenukila echi: Satana, mukasunune!

Mu Lijina lya Yesu Kulishitu, echa ikiye apwenga kanawa, twaya ku liuka lino, kaha hana unjiho waupahu wa Kalunga. Amena.

²¹³ Jino, chawashi nge ngachize, pwevo wakalemesa, ove muya nakupwa kanawa. Una fwelela echi ndumbu walunga?

[Ndumbu walunga Branham kufuma kumutoloki—Muka.] Una fwelela enu hano, nge muya nakupwa kanawa?

Yako jino, putuka kulya kala vyosena ove. . .ove muya jino, pwako wakwoloka.

Jino, enu mwatondo kuhana kaye kalepa, na kulewisa; nachiya nakuhana kalepa, kaha kumilewisa. Jino, Kalunga wa Mwilu Ikiye mwafumisa kalepa mukaye na kujimbangana shili, ha Lijina lyolimwe, nahase kuhana kujimbangana shili, fumisa kalepa hali enu, kaha nakumilingisa enu kanawa.

Kufwelela Ikiye nahase kulingisa ou muchima kupwa kanawa? Ove unahase kulinga ngachize, ove muya nakupwa kanawa...?...

²¹⁴ Mwata Yesu, ou pwevo wakuhutwa atela kutwama muli echi chitwama chiyoyelo chenyi kaha jino, nakupwa wakufumako. Oloze etu tuli nakulomba echi nge ngolo ja Satana vajifumise hali ikiye. Echa ikiye ayoye na kutambuka na kupwa kanawa nge omu apwile. Etu twachilombo mu Lijina lya Yesu. Amena.

²¹⁵ Ove wafwelela? Echi chinapu mulimo wakukuma lyehi, chinalingika lyehi. Ukalu muka? Chakuzeneka woma, na... Kachapwileko...? Ove vakukile ku kansa lwola lumwe...?... Kasununa, hana vyuma vyosena kuli Yesu.

²¹⁶ Mwata Yesu, Nguli nakuhaka livoko hali ou pwevo na kutenukila misongo yenyi. Ngunatachikiza ikiye ali Mukakulishitu, wakusemuka mu Shipilitu. Ngwayifumisa hali ikiye, mu Lijina lya Yesu Kulishitu Lijina lya mwaza. Amena.

²¹⁷ Mwata Kalunga, hali ndumbwenyi walunga wamwaza, Ngunalombo ulwilo wenyi mu Lijina lya Yesu. Kwimana aha. Amena. Nachiya nakulingika.

²¹⁸ Walizange kutambula kuka chove, mwana walunga? Eyo, chinayi kulivoko Lyenyi.

²¹⁹ Mwata Yesu, hali ou mukweze walunga, ambanga ngwenyi, kufuma kuli Ove, ikiye eji kulombanga kutambula kuhinduka chenyi. Nge ngamba Yove, Nguli nakuhaka mavoko ami hali ikiye mu Lijina lya Yesu Kulishitu...?... Amena.

Jino, kala...?... jino, ove sanyika kaha ha Lijina Lyenyi. Jino, keshi—keshi yami...?...

²²⁰ Tata Kalunga, kupwa kaha nge mwana uze lwola lumwe akundaminyine ha thulo ya mama, ikiye anguvendejekele na—na nakulomba nenyi na kukwata livoko lyenyi lyalindende omwo ikiye apwile nakulembejeka kamba. Jino, Satana kumuhaka mukanokelo kavakakuzaluka. Kalunga, ikiye ejile ku Liuka lyajila lya Kalunga wakuyoya, Liuka lize lya kusemuka ku Shipilitu ya Kalunga, lize Liuka lize lya Shipilitu ya Kalunga yayoyelamo, kaha nakulingisa Ivene kumutachikiza. Kaha lelo, ha kulomba, etu tunakusokola ou pwevo kumufumisa muli aka kanokelo. Mu Lijina lya Yesu Kulishitu, etu tulombe. Amena.

Yako kwimbo, ove uli wakwoloka.

Ngwasakwila ha kwiza, kuhula mama yove; uze apwa mwana walunga wamwenemwene.

²²¹ Eli linapu likumbi lyove lya kusokoka. Mwata Yesu, hali ou mukweze wapwevo, ha ulwilo wa lunga lyenyi na kusokoka cha muliu wenyi, echa ikiye achitambule mu Lijina lya Yesu Kulishitu, Ou ali nakuhanjika “kwiza, kufwelela echi jino,” kaha chinapu chuma chakukuma lyehi.

²²² Mwata, vandotolo vanaputuka, Mwata, chili mumujimba wenyi, kwiza muliso lyenyi. Ikiye neza mangana vamusokole, kuno kukamenga, shimbu eli Liuka lyajila lili nakulomba, Ngwalombo kusokoka chenyi mu Lijina lya Yesu Kulishitu, echi kuwema chiseze mujimba wenyi. Mulimo wakukumisa lyehi.

Hali mwaneyi walunga, Ngwakisula eli lilesu. Echa kwivwa na kuyoya chamwaza chikinduluke mulitwitwi lyenyi . . . ? . . .

²²³ Jino Liuka linahanjika; jino Liuka linapu Mujimba wamwilu wa Kulishitu. Etu tuli nakukulombelelako. Talenu? Etu katweshi—etu katweshi kulivuluka kupwa mukaye chekako. Etu katweshi nakuhanjika hali kukimbujoa okwo tuli nakuya. Etu tunawane Jila. Etu twasemukile mulize Jila. Etu tuli na Liuka lya Kalunga Wakuyoya (chihanda chaechi); mukikovene, echi chalimwangile kaye kosena. Oloze eli linapu lizavu lya vakiko. Lelo, hamwe etu natwiza hamwe mu Lijina Lyenyi. Etu tuneza nakulinga chize Ikiye ahanjikile, kulinga. Chuma Ikiye keshi kuhasa kusolola omwo etu natwiza hamwe. Kulombelela vakakuviza, haka mavoko hali vakiko, “kulomba chalufwelelo nachimulwila mukakuviza.”

²²⁴ Echa ukalu wa muchima wove ukuseze. Mu Lijina lya Yesu Kulishitu, Ngunononoka kukutuma cha Kalunga anguhana yami . . . ? . . .



LIZE LIKUMBI HA KAVALI LVE60-0925

(That Day On Calvary)

Ou Mujimbu kufuma kuli Ndumbu wa lunga William Marrion Branham, vawambulwile hakuputuka mu Ingilishi ha Chalumingo na chimene, Katundwe 25, 1960, mu Mbalaka ya Branham mu Jeffersonville, Indiana, U.S.A., vanaufumisa mu muzu vakopele ha tepu na kuusoneka mu Ingilishi chakuzeneka kuwalumuna. Echi kwalumuna Lilimi vachinungulwile vausonekele na kuupangila kuli vaka Kukopa cha Lizu Lya Kalunga.

LUVALE

©2020 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org